

ROMANOS

Pablo Romano Sehuosicohua'ire Toyaye

1 Yë'ë Pablo, Jesucristo jo'yaë'ë. Maija'quëpi yë'ëre soini cui'ne i jëjo daoquëre nepi, yë'ëre i huaso cocare quëaja'quëre.

2 Maija'quëpi ja huaso coca ai tsoe ca nëoquëna, ire quëacaicohua'ipi i de'o toyapëpëna toyaaahuë'ë.

3 Maija'quë mamaquë Jesucristo ayere Jesucristo pa'i de'oni judío pa'i ëjaë David tsëcapë aquë pajil'i.

4 Pai pa'iquëta'a Maija'quë mamaquë tutu quë'ire papi asayë, i de'o joyo tutupi yo'oquëna, ju'isiquëpi huëni iñouna.

5 Jaje pa'ina, Jesucristo do'ipi Maija'quë yëquëre i mamipi i jëjo daocohua'ire nepi, si'a yeja pa'icohua'ipi sehuoni cui'ne i case'ere necaicohua'i pa'ijajë caquë.

6 Mësaruje jaohua'i acohua'ipi Maija'quë soisicohua'i pa'iyë, Jesucristo tsecohua'i pa'ijajë caquë.

7 Si'aohua'i Roma daripë acohua'i Maija'quë soisicohua'ire caquë toyayë, mësarute. Maija'quë oi soipi, mësarupi ina isisicohua'ipi de'oye pa'ijajë caquë. Soisicohua'ipi de'oye pa'ijë'ë, Diusu Maija'quëpi cui'ne Jesucristopi de'oye pa'iyë isiquëna.

Romana Pablo Do'i Sai Ëaye

8 Du'ru macarepa Jesucristo do'ire yë'ë ja'quëre sihuayë, si'aohua'ire mësaruni cuasajë. Mësaru Maija'quëre cuasajë pa'iyë si'a huë'ña

pa'icohua'ire de'oye quëajëna, sihuayë. Sihuaquë de'ozi cayë, Maija'quëna.

⁹ Yë'ë si'a joyorepa cuasaguë Maija'quëre necai pa'iyë, i mamaquë cocarepa quëacaiquëpi. Maija'quë api, iti ñasiquë si'anë yë'ë mësarute cuasaguë sëcacaiye.

¹⁰ Si'anë Maija'quëre señë, i yëyepi pa'ina, yë'ë jaro do'i sasi'i caquë.

¹¹ Jaje pa'ina, cocaiye yëyë, mësarute joyo pa'ive, ai jerepa tutu quë'iohua'i pa'ija'cohua'ire.

¹² Ñeje caquë cayë: Maija'quëre mai cuasayere sa'ñe cocaiyere caquë yë'ëpi mësaru cuasayere se cocaine, mësarupi yë'ë cuasayere cocaijë'ë. Jaje yo'ojë sa'ñe cocaiye pa'iji.

¹³ Maija'quë do'ijë yë'ë mësaru quë'ro sasi'i si'anë caquëta'a yureje ja yë'ta'a saiye pañere asajë'ë caquë quëayë. Hueare tëayeje pa'ye mësaruja'a Maija'quë joyo ayere sani tëasi'i caquë cuasahuë, yequë hue'ña judío peocohua'ija'a tëayeje pa'ye.

¹⁴ Jaje pa'ina, yë'ë sehuosi do'ire tañe asacohua'ire, huesëcohua'ire, ëjaohua'ire cui'ne ëjaohua'i peocohua'ire, si'aohua'ire quëaye pa'iji.

¹⁵ Jaje yo'oquë cui'ne mësaru Roma pa'icohua'ireje Maija'quë coca quëacaiye yëyë.

Maija'quë Coca Tutu Quë'i

¹⁶ Maija'quë huaso coca quëaye yë'ëre huajëya'ye nëiñe paji. ¿Maija'quë tutu quë'i cocarepa me yë'ëre huajëya'ye nëico'ni? Si'aohua'ire ite sehuocohua'ire huaso ja'ñe a'ë, judío paire cui'ne judío paí peocohua'ireje.

¹⁷ Jaje pa'ina, necaire paye pa'iji cuasa do'ire Maija'quëpi nuñerepa pa'icohua'ire neñere quëaji, de'o cocapi: "Nuñerepa pa'iquë cato, Maija'quëpi necaire paye pa'iji cuasayepi pasipi" caji tsoe toyase'e.

Do'i Quë'iohua'i Pa'iye

¹⁸ Iohua'i co'aye yo'oyepi Maija'quë coca ye'yayere sañope yo'oyë. Jaje yo'osicohua'ire Maija'quëpi ma'tëmore papi iohua'i yo'osi do'i co'ayere papi sái ja'ñe jëjo dao ja'ñere iñopi, maire.

¹⁹ Jaohua'i tsoe asayë, ta'ñe Maija'quë ayere. Jaje pa'ina, ipi jaohua'ire du'ru iñopi, i ayere ña ja'ñe.

²⁰ Si'aye iye yeja pa'ije ipi de'huapi. I de'huani pa'i macapi huëoni i nese'ere ñajë Maija'quë pa'ije asayë, ite ñama'pë pa'inije. Jaje pa'ina, Maija'quë tutu quë'ipi cui'ne ti paní huesëquë pa'ije asajëta'a de'oye yo'oye pasi do'ire, ca de'huani jëa ti'añe peoji, jaohua'i.

²¹ Jaje Maija'quë pa'ije asacohua'ipi Maija'quëre papi cajë ite oiyé pahuë. Cui'ne yequeje de'oquëre papi caye pahuë. Coa ai jerepa yeque ti do'i peoyere cuasahuë. Cui'ne iohua'i huesë joñoapi nea hue'ñana ne huesëhuë, co'a joñoa hue'e do'ire.

²² Jaje pa'ina, ta'ñe pa'iohua'i a'ë cacohua'ita'a coa ai jerepa huesëohua'i pa'iyë.

²³ Maija'quë de'oquërepa pa'iquëta'are tìñere señë, ju'icohua'ijé pa'iohua'ire de'huase'ere, pajé pa'ire, pi'aje pa'ire, nëicohua'ijé pa'ire cui'ne aña je pa'ire de'huase'ere.

24 Jaje pa'ina, señajë mësaru yëyeje yo'oje pa'ijë'ë caquë jeocopi, Maija'quë. Jaje caquë jeocouna, huajëya'ye sa'ñe yo'ohuë, johua'i capëje ti oiyepooyerepa.

25 Nuñerepa Maija'quë cocare asaye yëma'pë coa ai jerepa cosoyere asahuë. Cui'ne jaje yo'oje Maija'quë de'huasi co'amañare sei'ë, de'oquëre pa'ë cajë. Maija'quëre pare sema'pë cui'ne Maija'quëre pa'ë caye pahuë. Maija'quë cato ti de'oquëre pa'ë caye pa'iji, si'anë. Jaje pa'ijaquë.

26 Jaje pa'ina, Maija'quëpi jeocopi, co'aye si'sire yëcohua'ini coequë. Jaje pa'ina, nomiohua'ije Maija'quë cuañese'e jeoni sa'ñe nomiohua'ija'a ëmëre yo'oyejë yo'ohuë, si'si.

27 Cui'ne jaje ëmëohua'ije nomiohua'ire yo'oye jeoni sa'ñe ëmëohua'ija'a yo'ohuë. Ëmëohua'ipi huajëya'ye yequë ëmëohua'ini yo'o do'ire johua'i capëapi ai yo'oyë, johua'i co'aye yo'o do'ire sai cuañojë.

28 Jaje pa'ina, johua'ipi Maija'quëre asaye coeye sëte, ije johua'ire jeocopi, joyo huesëohua'i pa'ijë johua'i yëyeje co'ayere pa'ijajë, caquë.

29 De'oye nuñerepa pa'ije peocohua'ipi co'ayese'epi tjmësicohua'ipi pa'iyë, si'si yo'oye, nomi yëye, ñaÑe jaiye tayo yo'oye. Co'amañare ñajë co'aye cuasaye, huani jeoñe, uihuaye, cosoye, co'a merepa co'acohua'ipi cui'ne co'a coca carojaicohua'i pa'iyë.

30 Yecohua'ini co'acohua'i a'ë cayë, Maija'quëreje coecohua'i a'ë, josa yo'ocohua'i a'ë, coa paipi ne tj'añe pa'iji cuasacohua'i a'ë, cui'ne yë'ëpi jerepa pa'i a'ë cuasacohua'i a'ë.

Co'ayere ai jerepa se cuasa huëocohua'ipi cui'ne pëca ja'quëohua'irejë de'oye seuhma'cohua'i a'ë.

31 Yëhuoye asa tì'añe coecohua'i a'ë. Iohua'i ca nëose'eje yo'o tì'ama'cohua'i a'ë. Iohua'i sihuama'cohua'i a'ë. Yecohua'irejë sañope yo'ose'ere sai de'huama'cohua'i a'ë. Ai yo'ocohua'ire teaye pa'iohua'ire yecohua'ire ñama'cohua'i a'ë.

32 Jäohua'i cato Maija'quë cuañese'e si'aye asacohua'i a'ë. Cui'ne asacohua'i a'ë, iye yo'osicohua'i pani do'i quë'iohua'ipi pa'ijë jüni huesëye pa'iji case'eje. Jaje asacohua'ita'a ai jerepa co'ayere yo'ojë pa'iyë. Cui'ne yecohua'ipi co'aye yo'ojëna, sihuajë yëjë ñañë.

2

Maija'quë Nuñere Papi Ca Huesoye

1 Yequë yo'ose'ere ña tëjini co'aye yo'oquë api ca huesoquë pani ca de'huani jëa tì'añe peoji. Më'ëpi yequë yo'ose'ere ña tëjini co'aye yo'oquë api ca huesoquë pani, më'ëja'a co'ye ca huesoye pa'iji, më'ëje cui'ne yo'o do'ire.

2 Jaje pa'ina, assayë, mai Diusupi paï yo'oyere ña tëjini ña coca cayeje pa'ye nuñerepa ca huesoja'quë api, ja co'ayere yo'osicohua'ire nejoñe pa'iji ca maca.

3 Jaje pa'ina, më'ëpi cuasani Maija'quë paï ñape yo'ose'e ña tëjini ca hueso mu'se tì'aëna, yecohua'ire tayoyë, cuasaquëpi cui'ne më'ëpi iohua'i yo'oyejë yo'oquë pani ña jëa'quë a'ë, cuasaquë? Jëaye peoji.

4 ¿Më'ëre ponañere caquë Diusu dahuëre quëcoquë yo'oquëna, i oi yo'oyere asama'lë huesëquë coeyë, më'ë?

5 Jaje pa'iquëta'are më'ë joyo jëa do'ire më'ë pa'ije ponëma'ë coequë paë'ë, më'ë. Jaje yo'oquë ai jerepa më'ë nejo cuñaño ja'ñere tsil'so tímëñë, më'ë Maija'quë paï ñape yo'ose'e ña tëjini ca hueso mu'se ti'aëna, sai ja'ñere më'ë yo'ose'eje pa'yé.

6 Ja maca ipi paï ñape yo'ose'eje pa'yé saija'quë api.

7 De'oye yo'oyere yo'o jujama'cohua'ipi ëja deoyere cui'ne i de'oye pa'iyere cui'ne ju'i ma'ñere co'esicohua'ini Maija'quëpi ti pani huesëyere isija'quë api.

8 Isiquëta'a yecohua'ipi iohua'ise'e cuasajë nuiñere seuoma'pë coa co'ayere tuiyë. Jaohua'ire cato Maija'quëpi pëi nejoja'quë api.

9 Si'aye co'aye yo'ocohua'ire ai yo'oye cui'ne oiyé pasipi, du'ru macarepa judío paipi jeteyo'je judío paï peocohua'ije.

10 Jaje pa'iquëta'are Maija'quëpi de'oye yo'osicohua'ire cato sihuaye, cui'ne ëja deoyere cui'ne de'oye pa'iyere isija'quë api. Du'ru macarepa judío paini jeteyo'je judío paï peocohua'ireje isija'quë api.

11 Jaje pa'ina, Maija'quë cato icohua'i yecohua'i a'lë caquë yo'oma'quë api, si'a yë'quë maca ñaquë api, si'a paire.

12 Jaje pa'ina, Moisés cuñañese'ere asama'cohua'ipi co'aye yo'ocohua'i pa'itoje ja yë'ta'a nejoja'cohua'i a'lë, Moisés cuñañese'ere asama'cohua'ire. Cui'ne Moisés cuñañese'ere

asasicohua'ita'a co'aye yo'osicohua'ire nejoñe pa'iji, Moisés cuañese'e ca do'ire.

13 Cuañese'ere coa asacohua'i cato, nuñerepa pa'icohua'i peoyë. Cuañese'ere yo'ocohua'i cato nuñerepa pa'icohua'i a'ë ca huesoye pa'iji.

14 Judío pai peocohua'i cato toya cuañese'eje ti peoyë. Jaje pa'iohua'ita'a cuañese'e pacohua'ipi yo'oyeje pa'yé yo'ojé pa'iyë, johua'i cuasase'epi. Jaje yo'ojé johua'ipi johua'ire cuañeñe neñë.

15 Jaje pa'ina, johua'i yo'oyepe iñóñë, johua'i joñoare cuañese'e pa'iyé paye. Jaje pa'ina, johua'i joñoa cuasayepi caja'coa, de'oji më'ë yo'ose'e panita'a co'aji, më'ë yo'ose'e. Jaje cani iñoji, cuañese'epi joñoare pa'iyé.

16 Cui'neje johua'ire caja'quë api, Maija'quë ca hueso mu'se pa'ina. Ja mu'se cato Maija'quëpi Jesucristo ja're si'a pai yahue yo'ose'e ña tējini ca huesoye pa'iji, yë'ë de'o cocarepa quëase'eje pa'yé.

Judío Pai Cui'ne Moisés Cuañese'e

17 Më'ëpi judío pai pa'lma'quëje ñani caquë jerepa pa'i a'ë cuasaquëpi, Moisés cuañese'ere asaquëpi, Maija'quëre pare payë caquë sihuaquëpi,

18 Maija'quë yëye tq'ñe asaquëpi, cui'ne cuañese'epi de'oyerepa tq'añere ye'yesiquëpi,

19 yecohua'i ñaco cä peocohua'ije pa'iohua'i pa'icohua'ire ye'yaquëre pa'ë cuasaquëpi, cui'ne nea hue'ñaje pa'i hue'ñare pa'icohua'ire de'oyepi miacaiyeje pa'yé yo'o iñóquëre pa'ë cuasaquëpi,

20 cuañese'e pacohua'ipi, tq'ñe asaye cui'ne nuñerepa yo'oyere ye'yaye payë cuasaquë

huesëcohua'ire ye'yaquë pa'iquëpi cui'ne tsije pa'iohua'ire quëa t̄i'añë cuasaquëpi.

21 Jaje pa'iquëpi ye'yaquë a'ë cuasaquë pani ¿me yo'oquë më'ëja'a co'ye ye'yama'quë'ni? Jare më'ëpi co'amaña yahue i ma'ñë a'ë quëaquéta'a ¿cui'ne me nesi'quë më'ëpi co'amaña yahue imaquë'ni?

22 Yequë nomiore yo'oma'ë caquéta'a, ¿me yo'oquë më'ëpi jaje yo'oquë'ni? Cui'ne më'ëpi coa de'huasicohua'ire ñani coequëta'a ¿me nesi'quë iohua'i se hueñña pa'i co'amaña yahue imaquë'ni?

23 Maija'quë cuañese'ere pare pacohua'ipi pa'iyë caquéta'a, mësarupi cuañese'ere de'oye sehuocaima' do'ire yecohua'ipi Maija'quë co'aquë api cayë.

24 Jaje yo'oye pa'ina, ñare paquë toyase'e caji: "Judío pa'i peocohua'i co'aye cayë, Maija'quëre, mësaru co'aye yo'o do'ire."

25 Jaje pa'ina, më'ëpi cuiri ca'ni tëasiquëpi Moisés cuañese'ere si'aye sehuocaito cocaiji, më'ë yo'ose'e. Jaje pa'iquëta'are më'ëpi cuañese'ere sehuocaima'quë pani ca'ni tëama'quëje pa'i pa'iyé pa'iji.

26 Jaje pa'ina, tëama'quëta'a si'aye cuañese'ere yo'oni ca'ni tëase'eje pa'i pa'iyé pa'iji.

27 Jaje pa'ina, i ca'nihuë tëama'quëta'a, cuañese'ere si'aye sehuoquëna, ja yo'oyepi më'ëni co'aye yo'oquëre iñaja'quë api, toyase'e paquëta'a cui'ne ca'ni tëasiquëta'a sehuoma'ë pa'isiquëre.

28 Judíorepa pasi'lí caquë coa émëje'ese'epi yo'ojoë t̄i'añë peoji. Cui'ne nuñerepa cuiri ca'ni tëaye cato émëje'epi yo'oye peoji.

29 Jaje pa'ina, judíorepa cato pa'iye pa'iji nuñerepa sa'nahuëre papi. Cui'ne cuiri ca'ni tēase'epi sa'nahuë joyore pana tēasiquëje pa'i pa'iye pa'iji. Coa cuañese'epi t̄i'añe peoji. Maija'quë joyo neñe a'ë, iye cato. Jaje pa'ina, iye cayeje ne cuañosiquë cato Maija'quëre papi de'oquë api caquë ña nëosiquë api, p̄ani p̄ai mañapi.

3

1 Jaje pa'ina, ¿iquere do'i paquë'ni, judío p̄ai pa'iye cui'ne cuiri ca'ni tēasicohua'i pa'iye?

2 Ja cato jaiye cocaiye pa'iji, du'rurepa Maija'quë judío p̄aina i coca de'hue pacaija'cohua'i a'ë caquë isisi do'ire.

3 Jaje pa'liquëta'are jaohua'i judío acohua'ipi nuñerepa yo'oyere yo'o jujani jeotoje Maija'quë cato i ca nëose'ere jare yo'o t̄i'aquë pa'iji.

4 Maija'quë cato i coca nuñerepa cayeje pa'ye yo'o t̄i'aquë api, si'a p̄ai coa cosocohua'i pa'itoje. I cato cosoma'quë api. Jaje pa'ina, toyasse'e cají: Nuñerepa pa'iquëre iñóñe pa'iji, më'ë case'epi.

Cui'ne yecohua'ipi më'ëre ña tējini ca hueso maca më'ëpi de'oquërepa etaja'quë a'ë.

5 Mai tayo yo'oyepi Maija'quë nuñe yo'oyere de'oyerepa iñojë pa'ito Maija'quë mai tayo do'ire nejoquë pani Maija'quë nuñe yo'oma'quëpi neoji. Jaje caye pa'liquë? P̄ani, p̄ai caye ayepi caye a'ë.

6 Jaje caye peoji. Maija'quëpi nuñe yo'oma'quë pani, si'a p̄ai tayo yo'ose'e ña tējini ¿me p̄ai yo'oyere ca huesoye pa'iquë'ni?

⁷ Jaje pa'iquëta'are yë'ë cosoyepi Maija'quë nuñerepa pa'iyere ai jerepa de'oye iñocaiye pa'ito ¿me není yë'lëre tayoquë api caye'ni?

⁸ Jaje pa'ito ¿me yo'oquë co'ayere yo'oma'quë'ni, de'oyepi pa'i ja'core? Iye cato yecohua'ipi cayë, maire. Co'aye cuasajë sañope cacohua'ini co'aye yo'ojë de'oyere tj'añe pa'iji ye'yayë cayë, maire. Jaje cacohua'ire nuñerepa yo'oquë nejoñe pa'iji.

Si'aohua'i Do'i Quë'iohua'ipi Pa'iyë

⁹ Jaje pa'ito mai judío paipi jaohua'i seña maca de'ocohua'ire pa'ë cuasajë pa'iyé? iPaní! De'ocohua'i peoyë. Tsoe mai judío paipi de'ocohua'i pa'i ma'ñë iñohuë. Jaohua'i ja're si'a yë'quë maca co'ayepi pacona, pa'iyë.

¹⁰ Jaje pa'ina, toyase'e caji:
Te'i macajë ti peoji, de'oquë.

¹¹ Asani pasi'i cacohua'ije peoyë.
Peoyë, Maija'quëre co'ecohua'ije.

¹² Si'aohua'i tayo sani huesëscohua'i a'ë. Si'aohua'i do'i peocohua'i a'ë, ti cocaima'cohua'ipi.
De'oye yo'ocohua'i, te'i macajë ti peoji, de'oye yo'oquëje.

¹³ Jaje pa'ina, si'aohua'i térëhuëa cato paire täxico de'hua sioma'coje pa'io, coa nejo cocare etaye.

Si'aohua'i tsemeñoapi coa cosoyë.

Aña tsimaje pa'yepi si'aohua'i yë'opoá pa'iyë.

¹⁴ Yequëre ai yo'o huano'i co'ayese'e yecohua'ire cayë, cui'ne sëjeñese'e.

¹⁵ Paire esa huani jéoñese'e yëcohua'i a'ë.

¹⁶ Si'aohua'i co'aye yo'oyepi ai yo'oye cui'ne nejoñe isiyë.

17 Cui'ne ñama'pë pa'iyë, de'oye pa'i ma'arepa.

18 Jaje pa'iohua'ipi ti ca'raye nëima'ëna, Maija'quëre cuasama'pë pa'iyë, a'ri mañaje.

19 Si'aye tsoe hue'ña Moisés cuañese'e judío paí cuañese'e pacohua'ipi si'aye yo'oye pa'iji caji cajé asayë, mai. Jaje pa'i quéta'are iohua'i tayo do'i ca de'huani jéaye peosipi. Maija'quë paí ñape yo'ose'e ñani ca hueso mu'se tì'asi maca si'aohua'i iye yeja acohua'i ca hueso cuañoja'cohua'i a'ë.

20 Jaje pa'ina, cuañese'ere sehuojë yo'ocohua'i cato Maija'quë ja're coñi pa'iyë tì'añe paja'cohua'i a'ë. Cuañese'epi mai tayose'ere iñoji.

Maija'quëre Cuasayepi Huaso Cuañoñe Pa'iji

21 Yure cato Maija'quë nuñerepa pa'iohua'ire de'ocohua'ire pare neñere iñopi, cuañese'e cayere yo'oma'ë, tìrona se oani. Iye cato Maija'quëre quëacaicohua'i toyase'ere cui'ne Moisés cuañese'e toyase'ere ñajë asayë, i jaje yo'oye.

22 Jaje pa'ina, Maija'quë iquë jerepa pa'ire cuasama'quëpi i nêñerepa pa'iyere isiquë api, coa si'aohua'i Jesús ire papi cuasacohua'ire.

23 Jaje pa'ina, si'aohua'i tayo yo'ocohua'ire sëte si'aohua'ire Maija'quë de'oyerepa tì'añe caraji.

24 Jaje pa'ijéta'are Maija'quëpi oi nuñerepa pa'iohua'ire nepi, i coa isiyepi, Jesucristo do'ipi huasoquë.

25 Jaje pa'ina, Maija'quëpi Cristo ju'ini tsie jeosi do'ipi paí co'aye yo'oye sai de'huaye nepi. Ja sai de'huayere tì'añe pa'iji, Jesuni necaiquëre papi asa do'ipi. Cui'ne tsoe acohua'i tayo yo'ose'ere coa sa tëto saimal'ë paji'i, Maija'quë. Jesús tsiese'epi sai

de'huapi. Jaje yo'oquë i nuñerepa pa'iyere cui'ne i quëcose'ere iñopi.

²⁶ Iñoni yureje Diusu nuñerepa pa'i a'ë caquë iñquoë yo'opi. Yëquëje cui'ne Jesús tsiese'epi Jesure ire papi cajë asacohua'ire nuñerepa pa'iohua'ire nequë a'ë caquë iñquoë yo'opi, Maija'quë.

²⁷ ¿Yure jerore pa'ico'ni, mai jerepa pa'iohua'i a'ë cuasaye? Tsoe peoco. ¿Me yo'oco peoco'ni? Maija'quëre necaiquëre pare cuasa do'ire peoco, pani cuañese'ere yo'o do'ire.

²⁸ Maija'quëre necaiquëre pare cuasaquëni nuñerepa pa'i api ca huesoye pa'iji, Maija'quëpi cuañese'e yo'oma'quë pa'itoje. Jare tsoe asayë, mai.

²⁹ ¿Mësarupi cuasato Maija'quë judío paí Diususe'e pa'iquë? ¡Pani! Judío paí peocohua'ije Diusure payë, ite.

³⁰ Jaje pa'ina, yequë Diusu peoji, te'i api. Jare ipi paire nuñerepa pa'icohua'ire ca huesoye pa'iji, ca'ní tëasicohua'ire cui'ne pacohua'ireje, coa si'aohua'i ite necaiquëre pare asacohua'ini.

³¹ Jaje pa'ito ¿coa mai ite necaiquëre pare asayepi ja'në cuañese'e jeocoye pa'iquë, cocai ma'ñe de'huani? ¡Pani, jaje yo'oye! Coa ai jerepa yureta'a cuañese'ere de'oyere pa'ë cacajjë yo'oyë.

4

Abraham Yo'ose'epi Iñóñé

¹ ¿Iquere mai ai Abraham tj'aë'ni, i yo'o do'ipi? I ayere cañu'u, yure.

²⁻³ Toyase'e caji: “Diusupi Abrahamre nuñerepa pa'ire ca huesopi, Abrahampi Diusuni ire papi caquë cuasa do'ire.” I yo'o do'ipi nuñerepa pa'i

pa'ieme Abraham tí'añe papi. Tí'asiquë pani jerepa pa'i a'ë cara'pi. Yure cato Maija'quë ña hué'ñana jaje ca tí'añe peoji.

⁴ Co'amaña necaiquëre saiñe cato coa ísise'e peoji, nesi do'ire saiñe a'ë.

⁵ Jaje pa'iquëta'are co'amaña nesi do'ire peoquëpi Maija'quëni nuñerepa pa'l'i ca hueso cuáñöñe pa'iji. Coa ite ire papi cuasa do'ire co'aquëre nuñerepa pa'iquë api, ca huesoquëni cuasa do'ire. Jaje yo'oye pa'iji.

⁶ Maija'quëpi yequëre ñani i yo'ose'ere cuasama'ë nuñerepa pa'ire ca huesoquëpi ai sihuaji. Davidje cui'ne capi, toyase'epi.

⁷ I case'e cato caji ñeje:
Sihuacohua'i pa'iyë, Maija'quëpi johua'i co'aye yo'ose'ere oni yejesicohua'ipi, cui'ne johua'i co'aye yo'o do'ire coa sai tosicohua'ipi.

⁸ Sihuauquë pa'iyë, Ëjaëpi co'aye yo'ose'ere cama'ëna, sai tosicohua'ipi.

⁹ ¿Jaje pa'ito iye sihuaye ca'ni tëasicohua'ise'ere sihuaye pa'iquë? Pani. Ca'ni tëama'cohua'ije ja sihuaye payë. Tsoe maipi asahuë. Toyase'e cato caji, Diusupi Abrahamre nuñerepa pa'ire ca huesopi, Abrahampi Diusuni ire papi caquë cuasa do'ire.

¹⁰ Jaje pa'ito ¿ite je yëhua nuñe pa'iquë api, Abrahamre caë'ni, i ca'ni tëasi jeteyo'je? Pani ja yë'ta'a tëama'në jaje ca nëopi.

¹¹ Ca nëosiquëpi jeteyo'je, ca'ni tëa cuáñopi, Maija'quë cuáñequëna. I ca'ni tëase'epi íñöñe a'ë, Maija'quëpi tëama'quë pa'inë nuñerepa pa'iquë api, ca huesose'ere. Cui'ne Abraham

cato t  ama'cohua'ipi Maija'qu  re necaiqu  re pare cuasacohua'i p  ca ja'qu   api. Jaje pa'ina, Abraham cuasase'eje cuasacohua'ire Maija'qu  pi nu  nerepa pa'iohua'ire ca huesoji.

12 Ca'ni t  ama'qu   pa'in   Abraham Maija'qu  re necaiqu  re pare cuasase'eje pa'y   ca'ni t  asicohua'ipi cuasacohua'i p  ca ja'qu   api.

Maija'qu   Ca N  ose'ere Ti'a  nere Qu  aye

13 Maija'qu   Abrahamre cui'ne i ts  cap   acohua'ire iye yejare isija'qu   a'   ca n  oni, ca n  oma'   pajil'i, Abrahampi cu  nese'ere yo'o t  a do'ire. Coa ai jerepa ca n  opi, Abrahampi Maija'qu  ni necaiqu  re papi cuasa do'ire. Ja do'ire Abrahamre nu  nerepa pa'ire f  aqua   Diusu isisi ca n  opi.

14 Jaje pa'ina, cu  nese'e caye yo'o t  acohua'ipi Maija'qu   ca n  ose'ere t  a  ne pa'ito, Maija'qu  re necaiqu  re papi cuasayepi do'i peoye patira'pi, cui'ne Maija'qu   ca n  ose'epi do'i peoye ne huesera'pi.

15 Cu  nese'e cato ai yo'o ja'  nere isiji, Maija'qu   sai de'huaqu  na. Cui'ne cu  nese'epi peoqu  na, ¿Me sa  nope yo'oye pa'iqu  ni?

16 Maija'qu   ca n  ose'e cu  nese'ere pacohua'ise'e t  a  ne peoji. Cu  nese'e peocohua'ije t  a  ne pa'iji. Jaje pa'ina, Abraham ts  cap   acohua'ipi t  a  ne pa'ijaqu   cani coa do'i peoye i ca n  ose'ere isiye pa'iji, Abraham cuasase'eje pa'y   cuasacohua'ini. Jaje pa'ina, Abraham mai p  ca ja'qu   api.

17 Toyase'epi caji: "Jai pa  i p  ca ja'qu  re y  '  pi nehu  , m  e'  re." Jaje Diusu ca n  ou  na. Abraham

cato Maija'quëre ju'isicohua'ire pa'iye isiquë api asapi.

¹⁸ Cuasaquépi ñani uteye peotoje Abraham cato ca nёose'erepa pa'i ja'coa cuasaqué utequë paji'i. Jaje pa'ina, jai pai pёca ja'quë de'opi, Abraham. Maija'quë ite ca nёose'eje pa'ye tї'api. Ja ca nёose'e cato caji: "Jai pai pa'i ja'cohua'i a'ë, mё'ë tsёcapë."

¹⁹ Ca nёose'ere asaquépi cien ometëca paye ja'i maca pa'ina, Zara i paco i coni aiohua'i pa'inije Abraham tsi paye peoji asaquéta'a necaiye pa'iji cuasase'e coa ne huesoma'ë paji'i.

²⁰ Jaje pa'ina, Maija'quë ca nёose'e jëa coeye papi. Coa case'e a'ë cuasaye papi. Coa ai jerepa pa'i ja'ñere pa'ë cuasapi. Jaje cuasaquépi ai jerepa cuasare paquë de'opi. De'osiquëpi Maija'quëre de'oquëre pa'ni caquë sihuapi.

²¹ Maija'quë si'aye ne tї'añe tutu paquëpi i ca nёose'ere neja'quëre papi cuasapi, jëa coeye peoyerépa.

²² Jaje pa'ina, Maija'quë nuñerepa nequë api cuasa do'ire nuñerepa pa'ire ca huesopi.

²³ Abrahamre Maija'quë nuñe pa'ire ca huesopi cajë toyase'e Abrahamse'ere cajë toyaye pahuë, mairejë cajë toyase'e a'ë.

²⁴⁻²⁵ Jaje pa'ina, maire nuñerepa pa'iohua'ire nesi'i caquë mai do'ire juçacani huëji'i, Jesú. Jaje pa'ina, mai Ëjaë Jesure ju'isiquëpi huëisiquëni ire papi cajë cuasacohua'ire Diusupi nuñerepa pa'iohua'ire ca huesoji, maipi ite necaire paquë api cuasa do'ire.

De'oye Pa'eye

¹ Pa'ire paji cuasa do'ire Maija'quë maire nuñe pa'iohua'ire ca huesopi. Jaje pa'ina, Maija'quë ja're coni de'oye pa'iyerepa ti'ahuë, asajë pa'iyë, mai Ëjaë Jesucristo do'ire.

² Cui'ne mai Ëjaë Jesucristo do'ipi de'hue ti'ahuë, Maija'quë i oi pa'i hue'ñarepa yure sihuajë pa'eye. Maija'quë de'oyerepa pa'i ñape pa'ija'cohua'i a'lë cuasajë ute jujama'pë pa'iyë.

³ Ja yë'ta'a ai yo'oyejé pa'iji. Jaje ti'aruje sihuayë, ai yo'oyepi quëcojë dahuëre pa'iohua'ire de'oye.

⁴ Quëcojë dahuëre yo'oyepi mai ti'añe pa'iji, neñasicohua'irepa pa'iyena. Neñasicohua'irepa pa'iyepi jëa coeye peoyerepa utejë pa'iyena ti'añe pa'iji, mai.

⁵ De'o joyo i isiquë yo'oyejá'a Maija'quëpi mai joñoana i oiyere isi tímë huesoji. Jaje pa'ina, mai jëa coeye peoyerepa utejë pa'eye coa teaye ute tayoje peoji.

⁶ Jaje pa'ina, co'ye huasoye peoquëna, ne ti'ama'cohua'i pa'i do'ire Cristo jucacaji'i, iti macarepa ti'aëna, co'acohua'ini caquë.

⁷ A'jiñe peoji, yequëni jucacaiye. Nuñe pa'ire pani jucacasi'i caquë yo'oquëjé peoji. Coa te'i pati'ñe pa'i api, ai de'oquërepä do'ire caquë jucacaiquë.

⁸ Jaje pa'iquëta'are Maija'quë cato i oiyé iñopi, maire, ja yë'ta'api co'acohua'i pa'itojé Cristo maire jucacaiyepi.

⁹ Jaje pa'ina, Cristo Jesús ju'isi do'ipi maire nuñerepa pa'icohua'ire ca huesopi. Jaje pa'ina, yure cato jerepa Jesús oi necai do'ire téji

mu'serepa Maija'quë pëi nejoquëna, jëaja'cohua'i a'ë, mai.

¹⁰ Mai ñite sañope yo'ocohua'i pa'i macata'a Maija'quë maire ñi mamaquë ju'i do'ipi ñi ja're de'oye pa'iyepi nepi. Jaje nesiquëpi yure cato jerepa Cristo huajéquërepa pa'iyepi huasoja'quë api, maire, tsoe ipi de'oye pa'iyepi sëte.

¹¹ Cui'ne jase'e pa'iyepi paji. Maija'quëre sihuayë, Cristo Jesús do'ire ñini pacacaijë. Jaje pa'ina, Cristo do'ipi ñi ja're coni de'oye pa'iyepi tì'ahuë.

Adán Cui'ne Cristo

¹² Te'i ñemëpi co'aye yo'o huëopi. Ja yo'o do'ire ñuni huesëye huëopi. Jaje pa'ina, si'aohua'i ñuni huesëye pa'iji, si'aohua'i co'aye yo'ocohua'i sëte.

¹³ Ja yë'ta'a cuañese'e peo'në co'aye yo'oyepi tsoe paji'i, iye yejare. Pa'ina, cuañese'e peoquëna, co'aye yo'ocohua'ire sañope caye peopi.

¹⁴ Jaje pa'iquëta'are Adán pa'inëpi Moisés pa'inëna si'aohua'i juju huesëahuë, Adán Maija'quë cuañese'ere sehuoma'ë yo'ose'eje pa'ye yo'oma'cohua'ita'a co'aye yo'ocohua'ipi. Adán cato Jesucristo daija'quëje pa'i paji'i.

¹⁵ Jaje pa'iquëta'are Maija'quë ñisiyepi Adán co'aye yo'ose'e tëto saise'ere pa'ë. Te'i Adán co'aye yo'osi do'ire jai pa'i jujuhuë. Jaje pa'ina, Jesucristo do'ipi Maija'quë jai pa'i de'oye pa'i ja'ñere, hua-soyere coa ñisiyepi jerepa pa'ye a'ë.

¹⁶ Adán co'aye yo'ose'epi maire necaiye peoji. Maija'quë ñisiyepi jaiye necaiye pa'iji. Te'ipi te'ore co'aye yo'o do'ire maire nejoñe pa'iji. Maija'quë ñisiyepi cato jaiye co'aye yo'osicohua'i pa'itoje nuñerepa pa'iohua'ire necaiye a'ë.

17 Ju'iñe je'quë te'i ëmë co'aye yo'osi do'ire tutu papi. Jaje pa'ye jerepa tutu paja'cohua'i a'ë, huajëyerepa pa'iyere Jesucristo te'i do'ire Diusupi nuñerepa pa'icohua'ire ca huesocohua'ipi.

18 Jaje pa'ina, Adán i co'aye yo'osi do'ipi si'a paire ne huesëja'cohua'ire nepi. Cui'neje pa'ye yo'oquë Jesucristo nuñerepa yo'oyepi si'ahua'i de'oye ti ne huesëye peoye de'oye pa'i ja'ñe necaji'i.

19 Ñeje caquë cayë: Te'i de'oye sehuocaima'ë pa'isi do'ipi, si'ahua'i co'acohua'i paë'ë. Jaje pa'iquëta'are, te'i de'oye sehuocaiquë pa'isi do'ire jai pa'i nuñe pa'iohua'irepa pa'iyeye tì'ahuë, Jesucristo do'ipi.

20 Jaje pa'ina, Maija'quëpi cuañese'e isipi, co'ayepi ai jerepa pa'ija'quë caquë. Jaje jaiye co'aye pa'itojë Maija'quë oiyepi ai jerepa jaiye pa'iji.

21 Ja'në co'ayepi cato pa'i ëjaërepajë pa'ye pajil'i, paire cuañequë juni huesëyena saquëpi. Yure cato Maija'quë oiyepi nuñerepa yo'oyejä'a pa'i ëjaërepajë pa'ye de'opi, Jesucristo yo'o do'ipi, ti pani huesëyena saja'quë caquë.

6

Cristore Sehuosicohua'i Pa'kiye

1 ¿Jaje pa'ito me caja'cohua'i a'ni? ai jerepa co'ayere yo'oñu'u, Maija'quë oiyere jerepa iñoya'quë api caquë.

2 ¡Pani jaje caye! Tsoe mai co'aye yo'oye jeosicohua'i cato ju'isicohua'ijë pa'yepi pa'iyë. ¿Me jaje pa'ito ja yë'ta'api co'aye yo'ojë pa'iyë'ni?

³ Oco do maca Cristo Jesús ja're tsioni pa'iyena cacajë i ju'ise'eje pa'ye juë'ë, mai. Mësaru jare tsoe asayë.

⁴ Jaje mai oco do maca ju'isicohua'ire Cristo ja're te'e ta cuañosicohua'ije pa'iohua'i pa'iyë. Ja maca Cristore pëca ja'quë i de'o tutupi yo'oquëna, Jesús huëise'eje pa'ye cui'ne maije huëiye pa'iji, huajëye pa'iyena.

⁵ Jaje pa'ina, Cristo ju'ise'eje pa'yena tsiosicohua'i sëte, cui'ne i huëise'eje pa'ye maipi huëiye pa'iji.

⁶ Co'ayere ëjaëjë pa'ire pajë necaiyere cui'ne mai paiese'e yë tuture nejose'e pa'ijaquë cajë Cristo ja're que cuañosicohua'ipi pa'iyë asayë, mai.

⁷ Jaje pa'ina, ju'isiquë cato co'ayepi jo'ya ne-siquë peoji.

⁸ Jaje pa'ina, Cristo ja're te'e ju'isicohua'i pani i ja're coni pa'ija'cohua'i a'ë cuasayë.

⁹ Tsoe maipi asajë pa'iyë, Cristo te'e juni huesësiquëpi tijupë jüni coñe pase'e. Ju'iñe ite tijupë quëcoye peoji.

¹⁰ Co'a tutupi naë payere ti nejoquë Cristo juji'i. Jaje ju'isiquëta'a i huajëquë pa'iyepi Maija'quëre pacacaiji.

¹¹ Jaje cui'ne ju'isicohua'ije pa'i pa'ijë'ë, co'aye itire yo'oma'pë cajë, co'aye yo'oyepi pa'itoje. Jare cuasajë huajëcohua'irepa Maija'quëre pacacaijë'ë, mai Ëjaë Cristo Jesús ja're pa'icohua'ipi.

¹² Jaje pa'icohua'i sëte mësaru co'ayepi cuañe cuañosiquëje pa'i pajë'ë, capë yëyere yo'oma'pë cajë.

¹³ Yureta'a mësaru capëare isima'pë pa'ijë'ë,

co'ayere yo'oja'co cajë. Mësarù capëare ju'isicohua'i huëisicohua'ije pa'icohua'ire Maija'quëna isijë'ë, de'o nuñerepa yo'oyere nejajë cajë.

¹⁴ Co'aye yo'oyepi yureta'a ëjaë cuañeñeje pa'ye maire cuañe cuañoñe peoji, Moisés cuañeñepi maire meñe cuañe cuañoñe peo do'ire, coa Maija'quë oiyepi meñe pa'i do'ire.

Jo'yaohua'i Pa'kiye Ayere Quëaye

¹⁵ ¿Maija'quë oi ñacaiyere meñe pa'ijë cuañese'e meñe peo do'ire co'ayere yo'oje pa'kiye pa'iquë? Pani. ¿Me neni jaje yo'oye'ni?

¹⁶ Jaje pa'ina, mësarupi tsoe ta'ñe asayë. Jo'yaë cato ëjaëna isisiquëpi i cuañeñere sehuocaija'quëpi pa'iji, cajë. Jaje pa'ina, ëjaëre necaicochua'i cato sehuocaiye pa'iji, iohua'i ëjaëni. Jaje pa'ye cui'ne co'aye yo'oyere sehuocacohua'i cato co'ayere ëjaëre payë. Jare sehuocaiye cato ju'iñena saye a'ë. Ja yë'ta'a Maija'quëre sehuocaiye cato nuñerepa pa'iyena saye a'ë.

¹⁷ Ja'në co'ayepi jo'ya nesicohua'ipi paë'ë, mësarù. Pa'isicohua'ita'a Maija'quë ye'yayena isisicohua'ipi si'a joyorepa ja ye'yayere sehuohuë. Jaje pa'i do'ire Maija'quëre sihuaquë de'oji cayë, ite.

¹⁸ Yureta'a co'ayere ëjaëre peocohua'ipi Maija'quëre necaiyena, jo'yaohua'i de'ohuë, nuñe pa'iyere yo'oñu'u cajë.

¹⁹ Mësarù ta'ñe asa ja'ñere caquë coa pa'i cayere papi cayë. Ja'në mësarù co'ayena isisicohua'ipi co'ayere necaijë paë'ë, co'ayere yo'oje, co'ayere mësarù capëpi necaise'eje pa'ye. Yureta'a nuñe

pa'iyena mësaru isiye pa'iji, Maija'quë yëyere yo'cohu*a'i* pa'ija'cohua'ipi, ina isisicohua'ipi.

20 Mësaru co'ayepi cuañesicohua*'i* pa'i maca, nuñerepa pa'iyere necaijë pa'ije pahuë.

21 ¿Iquere de'oye pa'ije isi o'ni, ja co'aye yo'oyepi, yure mësaru huajëya'ye asa cuañoñepi? Ja cato ju'iñena saye pa'iji.

22 Jaje pa'isicohua*'ita'a* yure, de'oye pa'iyë. Co'ayepi jo'ya nesicohua*'ire* paye paquëna, Maija'quëre necaiyena cacani pa'iyë. Jaje pa'ina, mësarute de'oyerepa pa'ije necaiji. Iyeta*a* Maija'quëna isisicohua'ipi pa'ijë cui'ne tëjiyere papi ti pani huesëyere payere necaiji.

23 Co'aye yo'osi do'ire co'ayepi sainé cato ju'iñe a'ë. Jaje pa'iquëta*'are* Maija'quëpi mai Ëjaë Jesucristo do'ipi maire coa isiye cato ti pani huesëye a'ë.

7

Huejayeje Pa'ye Quëase'e

1 Maija'quë do'ijë, mësaru Maija'quë cuañese*'ere* asacohua*'ipi* asayë, mai huajëcohua*'i* pa'i macase*'e* cuñañepi sëasicohua*'ijë* pa'iohua*'ire* paye paire.

2 Jaje pa'ina, nomio huejasico cato cuañese*'e* do'ire io ejëre sëasicojë pa'io pa'ico, ipi ju'ima'quëpi pa'ina. Ejëpi ju'isiquë pa'itota*'a*, cuañese*'epi* sëase*'ejë* pa'ye peoji.

3 Jaje pa'iquëta*'are* io pi ja yë'ta*'a* ejë pa'ina, yequë ëmëna tsiojäisico pani ëmëre yo'oco. Jaje pa'iquëta*'are* ejëpi ju'isiquë pa'itota*'a* yequë ëmëre tsiojaní paye pa'iji, ëmë yo'oco peoco ja maca.

⁴ Jaje cui'ne mësaruje Maija'quë do'ijë, Cristo ju'i do'ipi ju'isicohua'ijé pa'iohua'ipi pa'iyë, cuañese'epi naë pacona pa'isicohua'ipi, cuañese'ere ejëje pa'ire pasicohua'ipi yure cato, yequë ëmëni payeje pa'iohua'i a'ë, Cristo ju'isiquëpi huësiquëre pani, Maija'quë ñia hueñia de'oyere pare mai yo'oje pa'ija'cohua'ipi.

⁵ Ja'në mai yëyere yo'oje pa'icohua'i paë'ë. Pa'ijë mai co'aye yëyere cuañese'epi ne sëtouna, ai jerepa mai yëyere yo'ohuë. Jä yo'oyepi ju'iñena sapi, maire.

⁶ Cuañese'epi sëasicohua'ijé pa'iohua'i paë'ë. Yureta'a joyesicohua'ijé pa'iohua'i pa'iyë, mai ju'isi do'ipi. Jaje pa'ina, cuañese'epi jo'ya nesicohua'i peocohua'ipi Maija'quë joyo huajëye pa'iyë isiyepi Maija'quëre necaiyë. Necaima'pë pa'iyë, cuañese'e cayere.

Co'aye Yo'oyepi Pa'iyé, Yë'ëna

⁷ Jaje pa'ito ¿me caja'cohua'i a'ni, cuañese'e co'aye a'ë caye? ¡Pani jaje caye! Yë'ë quëaquëna, asajë'ë, yë'ë yo'ose'ere. Cuañese'epi yecohua'i co'amaña yëcaima'ë caye pato yë'ë asaye para'huë, yecohua'i co'amaña yëcaije co'ayere papi pa'iyé. Cuañese'e ëse do'ipi co'aye yo'oye asahuë.

⁸ Yecohua'i co'amaña yëcaima'ë pa'ijë'ë cayeja'a co'ayepi yë'ëre jerepa co'ayere yëyena ne sëto. Jaje cuañese'epi caye pato co'aye yo'oye ju'ise'eje pa'ye a'ë, itise'e pani.

⁹ Te'erepa tsoe yë'ë cuañese'e asama'quëpi coa paë'ë. Pa'ina, cuañese'epi titani co'aye yo'oyere ne co'yao.

10 Ne co'yacona, yë'ëpi juë'ë. Ju'ina, cuañese'e pa'iyé isisi'i ca nëota'a yë'ëre ju'iñena sapi.

11 Cuañese'epi yo'oma'ë cacona, co'aye yo'oyepi jerepa co'ayere cosoco. Co'ayepi yo'oma'ë cuañese'e cayeja'a ju'iñere isio.

12 Jaje pa'ina, ja cuañese'e cato Maija'quë tsë a'ë, nuñere pa'ë cui'ne maire cocaiye a'ë, si'aye Maija'quë cuañese'e cato de'oyere pa'ë.

13 Ja de'oyepi yë'ëre ju'iñena saye pao. Pacona, co'ayepi yë'ëre cato ju'iñena sao. Sacona, ja do'ire asahuë, co'aye pa'iyé. Cui'ne asahuë, cuañese'e ëseyeja'a co'ayepi ai co'ayerepa pa'iyé.

14 Jaje pa'ina, asayë, mai. Cuañese'e cato joyo aye a'ë cajë. Jaje pa'iquëta'are yë'ë cato paï a'ë, tara cui'ne ca quë'i a'ë. Jaje pa'ina, co'ayepi jo'yaëre pají, yë'ëre.

15 Jaje pa'ina, asa tj'ama'ë pa'iyë, yë'ë yo'oye. Yë'ë yëyere yo'oma'ë ai jerepa yë'ë coeyere yo'oyë.

16 Jaje pa'ina, yë'ë yo'oye coeyere yo'oni ja maca cuañese'e de'oyerepa pa'iyé asayë.

17 Jaje pa'ina, yë'ë pa'ima'ë pa'iyë, iti yo'oquë. Yë'ëre sa'nahuë co'aye pa'iyepi yo'oji.

18 Jaje pa'ina, yë'ë capë pa'ise'e yë'ë pa'iyé ti de'oye peoji, yë'ëre. Jaje pa'ina, de'oyere yo'osi'i cuasaquëta'a yo'o tj'ama'ë pa'iyë.

19 De'oye yë'ë yëyere nema'ë, coa ai jerepa yë'ë coeyere nequë pa'iyë.

20 Jaje pa'ina, yë'ë coeyere yo'oni yë'ë pa'ima'ë pa'iyë, iti yo'oquë. Yë'ëre co'aye sa'nahuë pa'iyepi yo'oji.

21 Jaje pa'ina, ñeje iye yë'ëre pa'iji, de'oye yo'oye yëquëta'a de'hue co'ayese're yo'oyë.

²² Jaje pa'i sëte yë'ë cuasaye cato Maija'quë cuañese're yëyë.

²³ Yëquëta'are yë'lë capëpi sañope yë'ë cuasa hue'ñana yo'oco. Ja cato co'ayepi yë'ë capëre pa'iyepi yo'oji. Japi cose'eje pa'ire paji, yë'lëre.

²⁴ ¡Co'aquëre pa'ë, yë'ë! ¿Nepi yë'ëre ne huasoja'cohua'i a'ni, iye capë ju'iñena saco aire?

²⁵ Coa Maija'quëse'e ne huasoja'quë pa'iji, Cristo Jesùs mai Ëjaë do'ipi. Jare asaquë sihuayë. Jaje pa'ito yë'ëpi Maija'quë cuañese're sehuocaiye pa'iji, yë'ë cuasayepi. Jaje pa'iquëta'are yë'ë capëpi co'ayena cuañe cuañosiquëpi jo'yaëje pa'i pa'iyë.

8

Maija'quë Joyo Do'ipi Pa'kiye

¹ De'oji, yure cato Cristo Jesùs ja're tsioni pa'icohua'ire ti sai de'hua cuañoñe peoji.

² Jaje pa'ina, co'ayepi cui'ne jüni huesëyepi jo'yaëre paquëni eto huasopi, yë'lëre, Cristo Jesùs ja're tsioni pa'iyepi, joyo pa'iyepi.

³ Moisés cuañese'e cato jaje eto huasoye papi. Paise'e co'aye yo'oyepi neñu'u cajë yo'ojoëna, cuañese'epi tutu peoye de'opi. Jaje pa'iquëta'are Maija'quëta'a ne ti'api, iye pa'iyere isiquë. Jaje pa'ina, jare ne ti'asi'i caquë i mamaquëre pai capë quë'ire cui'ne coa pajje pa'ire jëjo daopi, co'aye yo'o do'ire sai toçaijaquë caquë. Jaje yo'oní co'ayere ja capë do'ija'a nejo huesoye ti'api.

⁴ Maipi de'hue Moisés cuañese're yo'o ti'ajajë caquë pa'icohua'ipi yure mai pa'ima'pë pa'iyë,

noni paise'e pa'iyere. Coa ai jerepa yure cato joyo pa'iyepi pa'iyë.

⁵ Jaje pa'ina, paise'e noni pa'iyere pa'icohua'i cato paise'e cuasayere cuasajë pa'iyë. Jaje pa'ijëta'are joyo pa'iyere pa'icohua'i cato joyo pa'iyere cuasajë pa'iyë.

⁶ Jaje pa'ina, paise'e noni pa'iyere cuasayepi cato ju'iñena saye a'ë. Jaje pa'iquëta'are Maija'quë joyo ayere cuasayepi cato de'oye pa'iyena saye a'ë.

⁷ Coa paise'e noni pa'iyere cuasajë yo'ocohua'i cato Maija'quëre sañope yo'ocohua'i a'ë. Jaje pa'icohua'ipi Maija'quëre coecohua'ipi i cuañeñe sehuojë pani ti'añe peoyë.

⁸ Jaje pa'ina, paise'e noni pa'iyere sehuojë pa'icohua'i cato Maija'quë sihuaquë ñañere yo'o ti'añe peoji.

⁹ Jaje pa'ina, mësaru cato paise'e noni pa'iyere sehuoma'pë pa'iyë. Coa ai jerepa Maija'quë joyo cayere sehuocohua'ipi pa'iyë, Maija'quë joyopi mësaruni pa'ina. Jaje pa'ina, Cristo joyore peocohua'ipi pani Cristo tsecohua'ipi peoyë.

¹⁰ Mësaru ja're coni Cristopi pa'ito mësaru joñoa huajëyepi pa'iji, nuñerepa pa'i do'ipi. Jaje pa'iquëta'are mësaru capëa co'aye yo'o do'ire ju'isicohua'ije pa'ye pa'iyë.

¹¹ Cristo Jesure ju'isiquëni huëosi joyopi, ja joyopi mësaruteje ju'i capë quë'iohua'ireje huëoja'quë api, huajëye pa'iyena, Maija'quë joyopi mësaruni pa'i do'ire.

¹² Jaje pa'ito paise'e noni pa'iyere pa'ima'pë Maija'quë do'ijë. Mai cato joyo cayere pa'iyen pa'iji.

13 Jaje pa'ina, mësarupi paise'e yo'oje pa'iyere pa'ini ju'ija'cohua'i a'ë. Jaje pa'iquëta'are joyopi cocaine, paise'e yo'oje pa'iyere nejoni mësaru pa'ija'cohua'i a'ë.

14 Si'aohua'i Maija'quë joyopi cuaquëna, pa'icohua'i cato Maija'quë mamajë a'ë.

15 Jaje pa'ina, mësaru Maija'quë mamajëre pare ne joyore isi cuañohuë. Jaje pa'ina, ja joyopi mai ja're caquëna, ja'quëre papi cayë, Maija'quëre. Isima'pë jo'ya ne cuaññosi joyore, cui'naohua'ipi Maija'quëre ca'raohua'i pa'ija'a joyore.

16 Maija'quë joyopi mai joyo ja're coni nuñerepa Maija'quë mamajërepa pa'icohua'i a'ë quëayë, maire.

17 Jaje pa'ina, Maija'quë mamajë sëte mai si'aye i ca néose'e paja'cohua'i a'ë, Cristo ja're coni te'e. Maipi te'e i ja're ai yo'osicohua'i pani, i de'oyerepa jeteyo'je paja'cohua'i a'ë, i ja're coni.

18 Yure mai ai yo'oye teaye pa'ye a'ë. Jaje pa'ina, mai ai yo'oyepi coni ñato peoji, jeteyo'je mai pa'i ja'ñere. Jaje pa'ina, Maija'quë de'oyerepa papi maini pa'ina, de'ocohua'irepa pa'ija'cohua'i a'ë.

19 De'hue Maija'quë mamajëre iñoquëna, ñasi'i caco si'a yeja Maija'quë de'huasico ai ña ëa ju'io uteco pa'ico.

20 Jaje pa'ina, si'aye Maija'quë du'ru ne de'huase'e cato carajaise'e a'ë, ju'íñepi, ja'juñepi, cui'ne pu'cayepi pa'i do'ire. Maija'quëpi jare caquë yëni ne de'huapi, jeteyo'je yequë mu'se de'oyerepa pa'ija'coa caquë.

21 Jaje pa'ina, ju'ijë ja'juñe carajäsipi, si'aye Maija'quë ne de'huaquë pa'iyé. Ja do'ire si'a

mu'seña Maija'quë mamajë ai yo'ojë pa'icohua'ipi utejë pa'iyë, si'aye de'oyerepa pa'ija'coa cajë.

²² Jaje pa'ina, yurejë mai asayë, si'aye Maija'quë de'huasicopi nomio tsí coa huëoni ai a'si ju'iñeje pa'ye ai yo'oco oio pa'iyë.

²³ Iye yejase'e ai yo'oye paco maije ai yo'oyë, yequë mu'se pa'i ja'ñere joñoapi oijë. Du'ru pajë pa'ijë'ë caquë de'o joyore jsi nëosicohua'ije yequë mu'se de'oyere pare paja'cohua'ita'a ai oijë pa'iyë. Jaje pa'ina, joyore papi ai oijë uteyë, Maija'quë maire i huero mamajëre neja'a macare cui'ne mai huaso cuñañere cajë.

²⁴ Mai yequë mu'se pa'i ja'ñere jëa coeye peoyererepa ute do'ire huasosicohua'i pa'iyë, mai. Jaje pa'iquëta'are paipi i uteyere ña huesoni yequë mu'se pa ja'ñere uteye peoji. Jaje pa'ina, tsoe itire ña huesoni uteye peoji.

²⁵ Jaje pa'iquëta'are mai yure ña ma'ñere ñañu'u cajë uteni dahuëre quëcojë uteye pa'iji.

²⁶ Jaje cui'ne Maija'quë joyopi cocaiji, mai tutu peoyerere. Maija'quëre señe huesëyë, mai. Jaje pa'ina, de'o joyopi ai oi Maija'quëre seçacaiji, paï yë'opi ca ti'añe peoyererepa.

²⁷ Jaje seina, Maija'quë sa'nahuë joyorepa cuasaye ñaquëpi i joyo cuasaquë señe asaji, joyopi i tsécohua'i pa'i ja'ñere caquë, Maija'quë yëyeje pa'ye seina.

Si'aye Ne Ti'asicohua'i Pa'kiye

²⁸ Jaje pa'ina, i yëyere yo'oja'cohua'i a'ë caquë soisicohua'ire si'aye tëto saiyepi de'oye pa'i ja'ñere cocaija'coa, Maija'quë oicohua'ire asayë, mai.

29 Jaje pa'ina, Maija'quë maire tsoe du'ru ña nëopi i mamaquëje pa'iohua'i pa'ija'cohua'i a'ë caquë. Jaje pa'ina, i mamaquë cato sehuosicohua'i majayë pa'ija'quë api.

30 Tsoe i ja'në cuasa nëosicohua'ire Maija'quë soipi. Soisicohua'ireje nuñerepa pa'iohua'ire nepi. Nuñerepa pa'iohua'ire nesicohua'ireje i de'oyerepa pa'iyere isipi.

31 Jaje Maija'quëpi maire de'oyerepa necaisiquëre ¿nepi maire sañope yo'o tì'añe pa'iquë'ni? Ti peoji, sañope yo'o tì'aquë.

32 Maija'quë i mamaquëre papi mai do'ire jucacaijaquë caquë ¿isisiquë me isiye paquë'ni, i mamaquë ja're co'amaña pa ja'ñe? Si'aye isija'quë api. ¿Me paquë'ni?

33 Jaje pa'ito Maija'quë soisicohua'ire ¿nepi co'acohua'i a'ë caye pa'iquë'ni? Jare coa Maija'quëse'e maire nuñerepa pa'icohua'ire nesiquë pa'iji.

34 Cristo ju'isiquëpi cui'naëpi huëisiquëpi Maija'quë ëja te'tere ñu'i maini caquë pëca ja'quëre seccacai pa'ito ¿iqueipi maire nejoñe pa'iji ca huesoye pa'iquë'ni?

35 Jaje pa'ito ai yo'oyepi, co'a ju'ijë oiyepi, sañope yo'oyepi, aïñe peoyepi, ju'ije peoyepi, ne ju'iñepi, panita'a jundi huesëyepi ¿Cristo maire oiyere nejocaiye pa'iquë? ¡Paní!

36 Toyase'e cato caji:

Më'ë do'ire si'a mu'seña ne ju'iñere pa'iyë.

Jaje pa'ina, yëi ñamare huai hue'ñana sase'eje pa'iohua'i pa'iyë.

³⁷ Jaje si'aye iye yo'oye pa'iquëta'are maipi ñese quëcosicohua'irepa pa'iyë, maire oisiquë do'ipi.

³⁸ Jaje pa'ina, Maija'quë maire oiyere nejocaiye ti peoji. Nuñerepa asayë, yë'ë. Ja do'ire ju'iñepi, pa'iyepi, huñaohua'ipi, cuañecohua'i tutupi, cuañe tutupi, yure pa'iyepi, jeteyo'je pa'i ja'ñepi,

³⁹ Mëñe ayepi, meñe ayepi, Maija'quë de'huase'epi, nejo tì'añe peoji, Maija'quë maire oiyere mai Ëjaë Jesucristona tì'ase'ere.

9

Israel Paise'ere Maija'quë Jo'ya Nese'e

¹ Nuñerepa cayë, Cristore sehuoquë sëte. Coa cosoma'ë pa'iyë. Jaje pa'ina, Maija'quë joyopi cuasaquëna, yë'ë joyo cuasaye nëiñepi më'ë nuñerepa cuasayë cacaiji, yë'ëre.

² Jaje pa'ina, si'anépi yë'ë joyo a'siyerepa ai oi pa'iyë.

³ Jaje oi cuasayë, yë'ëpi merepa Cristore hua sani nejo cuañoñere pa'ina, yë'ë pa'i, Israel tsëcapë cajeohua'ipi jëacaitota'a de'ora'pi, cuasayë. Jaje yo'o do'ipi cocaiye pa'ito yo'ora'huë cuasayeque cuasayë.

⁴ Jaohua'i cato Israel tsëcapë acohua'i a'ë, Maija'quëpi i mamajëre nesicohua'i a'ë. Maija'quë i ohua'i ja're miañerepa pa'ina, pa'isicohua'i a'ë. Maija'quë cayere i ohua'ipi de'oye sehuojëna, i cocai ja'ñe ca nëose'e pasicohua'i a'ë. Moisés cuañese'e pacohua'i a'ë. Cui'ne Maija'quë huë'ere ñacaiyere pasicohua'i a'ë. Cui'ne i de'oye ca nëose'e pasicohua'i a'ë.

5 Jahohua'i cato mai aipë tsëcapë acohua'i a'ë. Jare ja tsëcapëja'a paina Cristoje ai de'opi. Jaë cato Diusu paji'i, si'aye jerepa pa'i. Jaëni de'oquëre pa'ni caye pa'iji, si'anëpi. Jaje pa'ijaquë.

6 Cama'ë pa'iyë, Maija'quë ca nëose'epi tu'añe paina, coa ai jerepa ye'ë cato cayë, si'aohua'irepa Israel tsëcapë acohua'ipi Israel paire peo do'ire.

7 Jaje pa'ina, Abraham tsëcapë acohua'i Maija'quë ña hue'ña si'aohua'irepa i mamajë peoyë. Jaje pa'ina, Maija'quëpi capi: "Mé'ë tsëcapërepä cato Isaacja'a ai de'oja'cohua'i a'ë."

8 Jaje pa'ina, iyepi maire tunarepa quëa iñoji, Maija'quë mamajërepä pa'iyé cato pai tsëcapëja'a tu'añe peoye, coa ai jerepa Maija'quë ca nëose'eja'a ai de'osicohua'ipi i mamajërepä pa'iyé tu'añe.

9 Jaje pa'ina, Abrahamre Maija'quëpi ca nëoquë capi: "Zara mamaquëre paja'coa, yeque ometëcahuë ye'ë co'i maca."

10 Iyese'e pa'iyé papi, yequeje cui'ne mai ai Isaac mamajërepä paë'lë, Rebeca caya mamajë.

11-13 Jahohua'ire Maija'quëpi ja ye'ta'a co'ama'në cui'ne ja ye'ta'a co'aye panita'a de'oye yo'oma'në Rebecare ca nëopi. Mé'ë mamaquë maja'yëpi yo'jeire necaiquë pa'ija'quë api. Jaje cui'ne toyase'eje cají: "Jacoboni oi, Esauni coehue." Jaje pa'ina, iye yo'ose'epi Maija'quë i cuasayeje pa'ye yeni yo'oquë sahuapi, iohua'i yo'o do'ire cuasama'ë, coa i ye do'ire.

14 ¿Jaje yo'oquëna, ñani maipi Maija'quë nuiñe yo'oma'quë api caja'cohua'i a'ni? ¿Pani me jaje caye'ni?

15 Ñajë'ë, Maija'quë Moisésre case'ere: "Yë'ë yëquëni oni yejesi'i teaye pa'ire ñani, cui'ne yë'ë yëquëni oi ñani cōcasi'i."

16 Jaje pa'ije sëte pāi yëyepi, pānita'a tutu yo'oyepi t̄i'añe peoji. Coa Maija'quë teaye ñani oi cōcayepi t̄i'añe pa'iji, i sahuasicohua'i pa'ije.

17 Jaje pa'ina, toyase'e caji, Egípto pāi éjaëre, Maija'quë case'ere: "Më'ëre Egípto pāi éjaëre ne-huë, më'ëja'a yë'ë tuture iñosil'i caquë, cui'ne si'a hue'ña pa'icohua'ipi yë'ë mamire asajajë caquë."

18 Jaje pa'ina, Maija'quë cato jare i teaye ñani oiquëni oiquë api, cui'ne jare i yëquëni jëa joyo ne huesoquë api.

19 Jaje pa'ina, mësarupi caja'cohua'i a'ë, yë'ëre. Cui'ne jaje yo'oquéta'a ¿me yo'oquë Diusu paipi co'ayë caquë'ni? ¿Nepi, i cuasaquë yo'oye sañope ca t̄i'añe pa'ina?

20 ¿Pai maca më'ë i quei'ni, Maija'quëre sañope ca ja'ñe? ¿Soto cua'coropi iti nesiquëre sañope caye? ¿Me nesi'quë yë'ëre co'aye nei'ni? cama'coa.

21 Jaje pa'ije sëte sotopi de'huaquë cato jare i yëyeje pa'ye neñe pa'iji. Jaje pa'ina, jare iti sotopi neñe pa'iji de'o cua'cororepa éja co'amañase'e neja'core cui'ne yeconi si'a co'amaña nerojaija'core neñe pa'iji.

22 Jaje pa'ina, iohua'i co'aye yo'osi do'ire saí cuañojë nejo cuañojal'cohua'i a'ë, co'a cua'conoaje pa'yepi. Jaohua'i josa yo'ojetna, Maija'quëpi ai dahuëre quécopi yo'opi, i pëi sañere cui'ne i tuture iñosil'i caquë.

23 Jaje yo'o maca maina de'o cua'conoaje pa'iohua'ina i pa'ije de'oyere pare iñosil'i caquë

yo'opi. Jaje pa'ina, maire teaye ñani oni yejepi. Oni yejeni tsoe hue'ñana de'ocohua'ire ëja de'huapi, maire, i pa'i hue'ñare coni pa'ijajë caquë.

24 Jaje pa'ina, Maija'quëpi maire soipi, judío pai acohua'ire cui'ne judío pai peocohua'i acohua'ire.

25 Maija'quë quëacaiquë Oseas toya pëpë Maija'quë capi, ñeje:

Yë'ë paire hue'yoja'quë a'ë, tí pa'isicohua'ini.

Yë'ë oima'co pa'isiconi yë'ë oicore hue'yosiquë a'ë.

26 Cui'ne mësaru yë'ë pai peoyë casicohua'ini,

Jare johua'ini, Maija'quë huajëquërepa mamajëre hue'yoja'quë a'ë.

27 Jaje pa'iquëta're Israel pai ayere Maija'quë quëacaiquë Isaíaspi ñeje capi: "Israel pai tsëcapë acohua'ipi jai pai pa'ija'cohua'i a'ë, jai tsiaya meja pa'ijeje pa'yerepa. Pa'ijëta'a coa a'ri pai maña jao acohua'ipi huasicohua'i pa'ija'cohua'i a'ë.

28 Jaje pa'ina, Ëjaëpi i case'eje pa'ye yo'o tí'aquë i nuñerepa yo'oyepi esa ne de'huaja'quë api, si'a yeja pa'icohua'ire."

29 Jare ipi Isaías capi, ñeje:

Si'a huiñaohua'i Ëjaëre papi mai tsire jisima'quë pa'ito

Tsoe Sodoma cui'ne Gomorra dari nejose'eje pa'ye nejosicohua'i patira'huë.

Judío Pai Cui'ne Maija'quë De'o Case'e

30 ¿Jaje pa'ito me caja'cohua'i a'ni, mai? Iyere asani, judío pai peocohua'ipi nuñerepa pa'iyere tí'ahuë, nuñerepa pa'iyere ti co'ema'cohua'ipi. Coa necaiquëre pare cuasa do'ipi tí'ahuë.

31 Jaje pa'iquëta'are judío pa'i cato nuñerepa pa'iyere t̄i'añu'u cajë cuañese'ere seuconi t̄i'añe pa'iji cuasajë yo'ohuë. Yo'ojëta'a t̄i'añe paahuë.

32 ¿Me yo'ojë pase'eje ñani, johua'i yo'oyepi t̄i'añe pa'iji, cuasa do'ire? Coa necaiquëre pare ite cuasama' do'ire t̄i'añe paahuë, johua'i yo'o do'ipi t̄i'añu'u cuasa do'ire. Jaje pa'ina, ju'ahuë, ju'a taocore, quënaona.

33 Toyase'e Maija'quë capi, ñeje: Yë'ëpi Sión c̄utihuëna quënaore oañë. Jaona mësaru sañope ju'aja'cohua'i a'ë. Iona quëco paquë cato, huajëya'ye pa'iyе peosipi.

10

1 Maija'quë do'ijë yë'ë joyore papi oi Maija'quëre señe cato Israel pa'i mañapi huaso cuañosicohua'ipi pa'ijajë cuasaquë señe a'ë.

2 Jaje pa'ina, cayë, johua'i cato Maija'quëre necaiye ai yëyë. Jaje pa'iquëta'are johua'i yëjë yo'oyepi nuñerepa asa t̄i'ani yo'oyere pa'iyе paji.

3 Jaje pa'ina, Maija'quëpi pa'i nuñerepa pa'iyе isiquë cajë asa t̄i'añe pañë. Jaje pa'ina, johua'i tutupi yo'ojë nuñerepa pa'icohua'i ponëñu'u cajë yo'oyë, Maija'quë nuñere pa'iyе isiyere seuocaima'pë.

4 Cuañese'e cayere Cristopi si'aye ne saopi. Jaje pa'ina, Maija'quëpi Cristoja'a nuñerepa pa'iyе t̄i'añe necaji'i, Cristore seuocohua'ini.

5 Cuañese'ere yo'ojë nuñerepa pa'icohua'i t̄i'añere Moisés toyapi, ñeje: Cuañese'e cayere si'aye yo'o t̄i'asiquëpi nuñerepa pa'iyere pa'ija'quë api.

6 Jaje pa'iquëta'are, coa necaiquëre pare cuasa do'ipi nuñerepa pa'icohua'ire neñepi, ñeje: “Mësaru joñoa cuasama'pë pa'ijë!ë. ¿Nepi ma'tëmo mëni Cristore quërëjani yejana daja'cohua'i a'ni? pанita'a,

7 ¿nepi coje sa'nahuëre pana cajeni Cristore ju'isiquëni huëoja'cohua'i a'ni?”

8 Toyase'e caye cato iye a'ë: “Më'ë yë'quë macare pare ti de'o coca pa'iji, më'ë yë'opore, cui'ne më'ë joyore.” Iye coca cato coa necaiquëre pare cuasaye a'ë. Ja cuasayere yëquë quëayë.

9 Jaje pa'ina, më'ë yë'opropi Jesure yë'ë Ëjaëpi cani cui'ne më'ë joyopi Maija'quëpi ju'isiquëre huëopi cuasaquë asani tsoe huaso cuañosiquë pa'iyë.

10 Jaje pa'ina, joyopi itire pa'ë cuasaquë pani tsoe nuñerepa pa'iquë pa'iji, cui'ne yë'opropi Jesús huasoquë api ite cajë sëni tsoe huaso cuañosiquë pa'iji.

11 Toyase'epi caji: “Ité nuñerepa pa'iquë api cuasacohua'i cato pañete sehuore'ni caye peosipi.”

12 Jaje pa'ina, peoji, tíñe pa'ljudío cui'ne yequë paí. Jaje pa'ina, mai Ëjaë si'aohua'i Ëjaëpi, jaëpi si'aohua'ire ite secohua'ire jaiye de'oye pa'iyë isiquë.

13 Jaje pa'ina, toyase'e caji: “Si'aohua'i mai Ëjaëre secohua'i huasosicohua'i pa'ija'cohua'i a'ë.”

14 Jaje pa'iquëta'are ¿me ite ire pare cuasama'cohua'i pani seja'cohua'i a'ni? ¿Cui'ne me ite sehuoye'ni, i ayere quëaye asama'cohua'i pani? ¿Cui'ne me asaja'cohua'i a'ni, iti coca quëacohua'ipi peoto?

15 ¿Cui'ne me iti coca quëaja'cohua'ire jëjo sao-cohua'ipi peoto sani quëaja'cohua'i a'ni? Jaje pa'ina, toyase'epi caji: “Airepa de'oji, de'o cocare quëaja'cohua'ipi tjtaye.”

16 Jaje pa'iquëta'are, si'aohua'i Maija'quë coca caye asani sehuoma'pë pa'iyë. Isaías toyase'e cayeje: “¿Ejaë, nepi yëquë quëaye asani itire pa'ni caye'ni?”

17 Jaje pa'ina, ire pare cuasaye cato, de'o cocarepa Cristo ayere quëase'ere cajoro asayeja'a tj'añe pa'iji, itire pa'ë cuasase'ere.

18 Jaje pa'ina, yë'ëpi señë: ¿Asama'pë pate, iti coca quëaye? Päni asahuë, jahohua'ipi. Jaje pa'ina, toyase'e caji:

Iti quëacohua'ipi quëajëna, si'a yeja pa'icohua'ipi asahuë.

Cui'ne coa si'a hue'ña maña iye yeja pa'icohua'ina jahohua'i coca quëaye tj'api.

19 Jaje pa'iquëta'are tijupé seni coñë: ¿Israel paise'e jaje pa'ito asama'pë pate? Jaje pa'ina, du'ru macarepa Moisés toyapi, Maija'quë case'ere, ñeje: Yë'ëpi mësaru oicohua'ire neja'quë a'ë, yecohua'ini neacute'ere ña éajëna.

Cui'ne mësaru pëicohua'ire neja'quë a'ë, huesöhua'ipi.

20 Ja jeteyo'je Isaías ca'rama'quëpi caji:

Yë'ëre co'ema'pë pa'isicohua'ipi tj'ahuë, yë'ëre.

Cui'ne yë'ëre jerore pa'iquë'ni cajë sema'pë pa'isicohua'ini iñohuë, yë'ë pa'iyé.

21 Cui'ne Israel päni Maija'quëpi caquëna, Isaíaspi toyapi, ñeje: “Si'a mu'sepi mësarute soiquë yë'ë jëña ca'cahuë nesiquëpi utehuë, de'oye sehuoma'cohua'ipi cui'ne sañope yo'ocohua'ini.”

11

Maija'quë Sahuaye Israel Paire

¹ Yure cui'ne señë, jaje pa'ina: ¿Jaje pa'ito Maija'quë Israel paire i pasicohua'ire jeocou? Pani nejoñe papi. Jare yë'ë i Israel paipi pa'iyë, Abraham tsëcapë aquëpi cui'ne Benjamín pa*i* aquëpi.

² Ai tsoe jare i Maija'quëpi Israel paire i tsécohua'i a'ë ca huesopi. Jaje pa'ina, yure jeocoma'ë pa'iji. ¿Huesëye mësaru Maija'quëre quëacaiquë Elíaspi Maija'quëre sei, Israel paire co'acohua'i a'ë cuasaquë sei case'ere toyase'e quëaji?

³ Sei capi: “Ëjaë më'ëre quëacaicohua'ire si'aohua'ire huani jéahuë. Cui'ne më'ëre isijë téojë se hue'ñaje nejo saohuë. Jaje yo'ojëna, yë'ëse'e te'i maca nëasiquëni cui'ne yë'ëreje huani jéoñu'u cayë.”

⁴ Jaje caquëna, Diusupi capi, jte: “Siete mil paire yë'ëre oicohua'ire hua nëohuë, de'huasi diusu Baalre do're ja'rujë séma'cohua'ire.”

⁵ Jaje ja'në yo'ose'eje pa'ye yureje judío pa*i* acohua'i a'ri ja'i pa*i* nëahuë, Maija'quë i oiyepi sahuasicohua'i.

⁶ Jaje pa'ina, Maija'quë maire coa isiyepi tí'añë pa'iyé sëte, pa*i* tutu yo'oyepi tí'añë peoñi. Yure pa*i* yo'o tutupi tí'añë pa'ito Maija'quë oi maire coa isiye peora'pi.

⁷ ¿Jaje pa'ito me yo'ore'ni? Israel pa*i* mañapi iohua'i co'ese'e tí'añë pahuë. Pajëna, Maija'quë sahuasicohua'ise'e tí'ahuë. Yecohua'ipi jëa joyo ne hueso cuañohuë.

⁸ Toyase'e cayeje pa'ye ñeje: "Diusupi isipi cuasa tj'a ma'a joyore cui'ne ñaco caje ña ma'ñere cui'ne cajo yacaje asa tj'a ma'ñere. Jaje pa'ina, yure iye mu'seje jaje pa'iohua'i pa'iyë."

⁹ Cui'ne Davidje capi:

Jare johua'i si'aye payë, cuasayepi co'ye johua'ire ne taoñe,

Cui'ne huatenëa de'osipi, mësarupi jona ju'ajë si'se cuañosicohua'i pa'ijajë caquë.

¹⁰ Ñaco caje ñama'cohua'i de'oja'cohua'i a'ë.

Cui'ne jete në me huesësicohua'i pa'ija'cohua'i a'ë, jaiye hue'e do'ire.

Judío Pai Peocohua'ipi Huaso Cuañoñe

¹¹ Cui'ne yure señë: ¿Si'aohua'i judío p̄ai ju'ajë peo hue'ñarepa tome sare? ¡Pani. Jaje yo'oye pahuë! Coa ai jerepa, jaohua'i de'oye sehuoma'pë ne huesë do'ire yecohua'ipi de'hue tj'ahuë, huaso cuañoñe, Israel p̄aipi ñani cui'neje pañu'u cajë oijajë cajë.

¹² Jaje pa'ina, judío p̄ai co'aye yo'ose'epi si'a yeja pa'icohua'i jerepa de'oye pa'iyé ponëpi, cui'ne johua'i yo'ojë co'a de'ose'epi judío p̄ai peocohua'i de'oye pa'iyé ponëpi. Jaje pa'iyé sëte judío p̄aipi Cristore sehuoni cui'naohua'ipi caca cocohua'i pa'ito ai de'oye pa'ija'coa, cuasayë.

¹³ Jaje pa'iquëta'are mësarute judío peocohua'ire caye payë, yeque maña. Yë'ëre Maija'quëpi jëjo daopi, judío p̄ai peocohua'ina. Jaje pa'ina, yë'ë yo'oye Maija'quë isise'e a'ë asaquë si'a yë'ë tutupi yo'oyë.

14 Jaje yo'oquëna, mësarupi sehuojëna, ñani yë'ë tsëcapë acohua'ije ñajë cui'ne ëa ñajë oijë huasosicohua'i pa'lijajë caquë yëyë.

15 Jaje pa'ina, judío paipí ña'nosicohua'i pa'ijëna, iye yeja pa'licohua'i de'hue Maija'quë ja're de'oye pa'ije tì'añe pa'iji. Jaje pa'ina, merepa pa'ija'coa'ni cui'naohua'ini Maija'quëpi ito, judío paipí sehuojë pa'i maca ai sihuaye pasipi. Ja cato ju'ise'eje pa'iohua'ipi pa'iyena huëiye a'ë.

16 Jaje pa'ina, pan sëpë aye poni du'ru nese'ere Maija'quëna isito si'a iti sëpëje Maija'quë isise'e pa'iji, de'ocore pare. Cui'ne Olivo soquë yë tsitamopi Maija'quëna isisico pa'ito iti capëaje isise'e pa'iji.

17 Yecohua'i judío paí acohua'i Olivo soquë yë capëa pa'isicohua'ipi të'ca tête cuañohuë, noni io ja're pa'licohua'ipi. Jaohua'i peo sa'ro pa'i do'ire mësarupi airo olivo soquë capëje pa'ipi sëo cuañohuë. Jaje yo'ouna, mësaru de'hue tì'ahuë, iti tsitapi pa'ije isiye cui'ne olivo pa'iyepi mësarute pa'ije isiye.

18 Jaje pa'ina, cuasama'pë pa'ijë'ë, yë'ë a'ë iti ñërepa capëa jerepa de'oquë. Jaje pa'ina, më'ëpi de'oquë a'ë cuasani, de'hua cuasa ñajaijë'ë. Më'ëpi tsita pa'ije isima'ë pa'iyë caquë coa tsitamoapi më'ë pa'ije isiji.

19 Jaje pa'iquëta'a yeque më'ëpi ca'ñne pa'i a'ë: "Jaje pa'ijë'ë, yë'ëpi olivona sëa cuañosiquë pa'ijaquë caquë të'ca têtepí jaohua'ire iti capë acohua'ire pare."

20 Ja cayere nuñerepa caye a'ë. Iohua'i ite coa necaiquëre pare cuasama' do'ire të'ca tête cuañohuë. Jaje pa'iquëta'are më'ë cato ite coa

necaiquëre cuasa do'ire de'hue iti ñëre pana tsiosiquë pa'iyë. Më'ë jaje pa'iyë sëte yë'ë a'ë jerepa pa'i cuasama'ë, coa airepa ca'raquë ñaquë pa'ijë'ë, mësarute të'ca tëte cuñañoñe.

21 Maija'quë iti ñërepa pa'isi capëare të'ca tëte jeosiquëme, me paquë'ni, mësaruje.

22 Ñajë'ë. Maija'quë nuñerepa de'oye yo'oquë api. Jaje pa'ita'a nuñe yo'oma'cohua'i cato tuturepa yo'oquë api. Co'aye yo'osicohua'ire saipi, iohua'i yo'osi do'ire. Jaje pa'iquëta'are mësarure de'oye yo'opi. Jaje pa'ina, më'ëpi de'oye i yéyeje pa'iyë pa'iji. Jaje pa'iyë pato më'ëreje cui'ne tëto tëaja'quë api.

23 Cui'ne yequeje, judío paipí iohua'i jëa coeyere jeoni sehuocohua'i pani, cui'na olivo soquë yëna sëo co cuñañoñë, tijupë. Maija'quëpi pají, tutu cui'naohua'ini sëo coñe cui'na ñëna.

24 Më'ëre judío peoquëta'are airo olivo soquë capëje pa'ini tíani de'o olivo soquë yëna de sëosiquë i ¿me neni de'o olivo soquë yë acohua'ire judío paire sëoye paquë'ni? Sëoja'quë api, de'o olivo soquë yëna cui'naohua'ini.

Israel Paire Tëjiyerepa Huasose'e

25 Jaje pa'ina, Maija'quë do'ijë, Maija'quë jse'e nesi'i cuasase'ere mësarute quëaye yëyë, mësarupi jerepa ta'ñë asajë pa'iohua'i a'ë cuasama'pë pa'ijajë caquë. Israel pai cato jai pai jëa joñoa ne cuñañosicohua'i pa'iyë, Israel pai peocohua'ipi si'aohua'i Maija'quë ca nëosicohua'ipi cacajajë cajë.

26 Ja maca yureta'a si'aohua'i Israel paipí huasosicohua'i pa'ija'cohua'i a'ë, toyase'e cayeje:

Sión daripëpi daija'quë api, huasoquë.

Dani jaëpi Jacob paï co'aye yo'ose'ere nejocaija'quë api.

²⁷ Jaje yë'ëpi iohua'i co'aye yo'ose'ere nejocaisi maca,

Ja maca jaohua'ini caquë iye ca nëose'ere pasipi.

²⁸ Jaje pa'iquëta'are huaso coca asaye coecohua'ipi Maija'quëre sañope yo'ocohua'i a'ë, mësarupi iohua'i coe do'ire de'hue asajajë cajë. Jaje pa'iquëta'are jaohua'i judío paire Maija'quëpi ja yë'ta'a oiji, iohua'i aipëni i tsecohua'ire nesiquë sëte.

²⁹ Jaje pa'ina, Maija'quë i sise'e jioye paquë api cui'ne i soisicohua'ire tiohua'ire nema'quë api.

³⁰ Ja'në tsoe mësarupi Maija'quëre sañope yo'ohuë, de'oye sehuocaima'pë. Jaje yo'osicohua'ini yure judío paipi de'oye sehuocaiye pa do'ire Maija'quëpi mësarute teaye ñani oi cocajil'i.

³¹ Mësaru ja'në de'oye sehuocaiye pase'eje pa'iohua'i a'ë, yure judío paipi. Jaje pa'iyë, Maija'quëpi mësarute teaye ñani oi cocaijaquë cajë cui'ne iohua'ireje ñani cocaijaquë cajë.

³² Jaje pa'ina, Maija'quëpi caji si'aohua'ire ite de'oye sehuocaima'cohua'ire ne huesopi, si'aohua'ire ipi oi teaye ñaquë cocasi'i caquë.

³³ ¡Airepa ta'ñe pa'i a'ni, Maija'quë si'aye asaquë pa'iquërep! I cuasaye asani quëaquëje peoji. Maija'quë yo'oquë pa'eye asa ti'aquë peoji.

³⁴ “¿Nepi Ëjaë cuasaye asa ti'añe pa'iquë'ni? Panita'a ¿nepi ite ñeje yo'oje'ë cajë ye'yaye pa'iquë'ni?”

³⁵ ¿Nepi du'ru Ëjaëre co'amaña isini yure isisi do'ire saijë'ë, cuañeñe pa'i que'ni?

³⁶ Jaje pa'ina, si'aye Maija'quë tse a'ë, i nesi do'ire. Ini pacacaiji, si'anë. Sihuayë, Maija'quëre jerepa pa'ire. Jaje pa'ijaquë.

12

Maija'quëna Isicohua'i Pa'iye

¹ Jaje pa'iye sëte Maija'quë do'ijë mësarute señë, Maija'quë oni yejesi do'ire, mësaru pa'iyere Maija'quëna isi huesejë'ë, huajëquëre pare. Ina isisicohua'ipi pani, Maija'quë sihuaja'quë api cui'ne ja isiye cato nuñerepa yo'oye a'ë.

² Jaje pa'ina, mësaruje pa'ijë'ë, iye yeja pai yo'ojoë pa'iyere coa ai jerepa jare yo'oma'pë. Mësaru cuasayere tjñe cuasajë pa'iyena ponajë'ë, mësaru pa'iyepi tjñe yo'ojoë pa'iyepi ponëja'core. Ponëona, yureta'a Maija'quë yëye asa tj'aja'cohua'i a'ë. Asa tj'acohua'ipi pani de'oyere, Maija'quë sihuaquë ñañere cui'ne nuñere pare asaye pa'iji.

³ Quëajaquë caquë Maija'quë yël'ëre coa isipi. Ja do'ire mësarute cayë, mësaru aquëpi te'ijë yë'ëpi ai asayë cuasaye pajaquë, iti cuasa maña ipi isiye ja'i maña cuasaja'quë. Jaje pa'ina, Maija'quëre necaiquëre pare asa do'ire yo'o ja'ñë isise'e ja'ye cuasajë yo'oye pa'iji. Tëto saiperepa cuasato co'aji.

⁴ Ñajë'ë, mai capë yo'o ja'ñë huahuese'e pa'iyere. Si'aye te'e co'amañare yo'oye paji.

⁵ Jaje cui'ne maije jai pai pa'ijëta'a Cristona tsiosicohua'ipi pa'i do'ire Cristo capë acohua'i pa'iyë. Pa'ijë pai ñape yequëna se tsiosicohua'ipi te'e capë acohua'i pa'iyë.

6 Jaje pa'ina, Maija'quëpi p̄ai ñapere t̄iñe pa'ye yo'o tutu isipi, i yéyeje pa'ye. Jaje pa'ina, Maija'quë ayere asani quëa tuture isisiquë pa'ito, quëañu'u coa necaiquëre pare mai cuasaye ja'ye.

7 Yecohua'ire cocai tuture isisiquë pa'ito, yecohua'ire de'oye cocañu'u. Yecohua'ire ye'ya tuture isisiquë pa'ito ye'yayese'e yo'oñu'u.

8 Yo'o jujacohua'ire quëa tuture isisiquë pa'ito quëa huasoñu'u, tutu quë'iohua'i pa'ija'cohua'ire. Co'amaña isiquë pani yë'ë de'oye yo'oyere ñajë'ë caye peoyerепа isiye pa'iji. Cuañe tuture isisiquë pa'ito de'oyerepa cuasaë yo'ojë'ë. Ai yo'ojë pa'icohua'ire cocaiquë pani sihuaquë cocaiye pa'iji.

Sehuosicohua'i Pa'eye

9 Sa'ñe nuñerepa oijë pa'ijë'ë. Co'ayere coejë, de'oyere yo'ojë pa'ijë'ë.

10 Sa'ñe oiyе pa'iji, Maija'quë do'ijë ëaye. Yecohua'ini de'ocohua'ire cuasajë coa tea ju'iñeje yo'oma'pë sa'ñe oijë de'oye pa'ijë'ë.

11 Nere pacohua'i pa'ijë'ë. Jøsaohua'i pa'ima'pë pa'ijë'ë. Mai Ëjaëni necaijë'ë, si'a joyorepa cuasajë toa tsë'ise'eje pa'i joyore papi.

12 Sihuajë pa'ijë'ë, mësarу yequë mu'se pa'i ja'ñere utejë pa'icohua'i. Ai yo'onije quëcojë'ë. Jeoma'pë pa'ijë'ë. Maija'quëre señe si'anë sejë pa'ijë'ë.

13 Cocaijë'ë, Maija'quë tsëcapë acohua'ire, iohua'ire jopo caraye pa'ito. Mësarute do'i daicohua'i pa'ito de'oye yo'ojë'ë.

¹⁴ Mësarute josa yo'ocohua'ire de'oye pa'ijajë cuasacaijë'ë. Iohua'i de'oye pa'ija'ñere secacaijë'ë, pani ai yo'oye pa'ijajë cuasajë señne.

¹⁵ Sihuacohua'i ja're tsioni pa'ijë sihuacohua'i pa'ijë'ë. Cui'ne ota oicohua'i ja're pa'ijë mësarue oicohua'i pa'ijë'ë.

¹⁶ Si'aohua'i sa'ñe de'oye yo'ojë pa'ijë'ë. Yë'ë a'ë, jerepa pa'i cuasama'pë pa'ijë'ë. Coa ai jerepa teaye pa'iohua'i pa'iyena ini pa'ijë'ë. Ta'ñe pa'iohua'i a'ë cuasama'pë pa'ijë'ë.

¹⁷ Saíma'pë pa'ijë'ë, co'aye yo'osicohua'ire cui'ne co'ayepi. Coa ai jerepa de'oye cuasajë yo'ojë'ë, pa'i ña hue'ñana.

¹⁸ Mësaru ai cuasaye ja'i maca de'oye yo'ojë pa'ijë'ë, yecohua'i ja're de'oye pa'iyere cajë.

¹⁹ Maija'quë do'ijë maña mësarupi saíñu'u cajë yo'oma'pë pa'ijë'ë, co'aye yo'ocohua'ire. Coa ai jerepa Maija'quëpi saicaija'quë api cuasajë pa'ijë'ë. Jaje pa'ina, toyase'e caji: "Yë'ëpi co'aye yo'ocohua'ire saíñe payë, si'seye pa'itoje," caji, Ëjaëre papi.

²⁰ Cui'ne caji jare ipi: "Më'ëre sañope yo'oquëpi ão ëa ju'ito ãojë'ë. Cui'ne cono ëa ju'iqué pa'ito ocuajë'ë. Jaje yo'ojëna, iti sañope yo'oquëpi yë'ë co'aquëre pa'ni cuasaja'quë api, huajëya'ye pa'ija'quëpi."

²¹ Co'ayena quëco cuãñoma'ë pa'ijë'ë. Coa ai jerepa co'ayere ñese quëcojë'ë, de'oye yo'oyepi.

13

¹ Si'aohua'i iye yeja cuãñe ëjaohua'ire de'oye se-huocaiye pa'iji. Jaje pa'ina, peoji, coa Maija'quë

yëma'ëna ëjaë de'osiquë. Jaje pa'ina, Maija'quëpi iye yeja cuañeja'cohua'ire nepi, jaohua'ire.

² Jaje pa'ina, paï ëjaohua'i cuañeñere sañope yo'oni Maija'quë de'oye yo'o ja'ñe caquë jeose'ere sañope yo'oyë. Jaje sañope yo'ocohua'i cato saija'cohua'i a'ë, co'ayepi.

³ Jaje pa'ina, ëjaohua'i cato pa'ima'pë pa'iyë, de'oye pa'icohua'ipi ca'rajajë cajë. Coa ai jerepa co'aye yo'ocohua'ire yo'o quëcoja'cohua'ipi pa'iyë. Më'ëpi ëjaohua'ire ca'raye peoye pasi'i cani de'oye yo'oquë pa'ijë'ë. Jaje pa'ina, ëjaohua'ipi më'ë pa'iyë neñani de'oye pa'iquë api caja'cohua'i a'ë.

⁴ Jaohua'i cato Maija'quëni necaijë pa'iyë, më'ë de'oye pa'iyere cajë. Jaje pa'iquëta'are më'ëpi co'aye yo'oquë pani ca'rajë'ë. Jaohua'i cato coa hua'ti mëama'cohua'i a'ë jare co'aye yo'oquëni saiñu'u cajë yo'ocohua'i a'ë, Maija'quëre necaico-hua'i sëte.

⁵ Jaje pa'iyë sëte de'oye a'ë, ëjaohua'i cuañeñe sehuoye. Pani johua'ipi co'aye yo'oma'cohua'ini cajë, coa ai jerepa tayose'e peoye nëina, mai cuasajë pa'iyere cajë de'oye pa'iyë pa'iji.

⁶ Jaje pa'ina, mësaru pa'i do'i sañë, ëjaohua'i Maija'quëre necaico-hua'ini cajë. Jaohua'i cato jase'e yo'ocohua'i a'ë.

⁷ Pa'i do'ire paï ñape saiñe pa'ito saijë'ë, paï ñapere johua'ire do'i paye ja'ye. Yeja pa'i do'ire saiñe pa'ito saijë'ë. Ëjaohua'i pa'ito ëjaohua'ire ñajë pa'ijë'ë. Coa si'aye do'i quë'johua'i pa'ito do'i quë'johua'ire ñajë de'oyerepa johua'ire cuasajë pa'ijë'ë.

⁸ Debe pama'pë pa'ijë'ë, yecohua'ire. Coa ai jerepa yecohua'ire oiyere debeje pa'ye pajë'ë,

yecohua'ire. Jaje pa'ina, coa pañini oiquë pani tsoe cuañese'e cayere yo'o tì'api, si'aye.

⁹ Cuañese'epi caji: Ëjëre cui'ne nëjore pacohua'ipi yecohua'ini yo'oma'pë pa'ijë'ë. Huani jeoma'ë pa'ijë'ë. Yahuerapa co'amaña ima'ë pa'ijë'ë. Éa ñama'ë pa'ijë'ë. Si'aye iye cui'ne yeque cuañese'ere coni yo'o tì'añu'u cani coa më'ë cajeire oijë'ë, më'ëja'a co'yé cuasayeje pa'ye. Ja caye ayere yo'oni pa'ito si'aye yo'o tì'añe pa'iji, cuañese'e cayere.

¹⁰ Jaje pa'ina, paire oiquëpi co'aye yo'oye paji. Jaje pa'ina, oiyepi si'aye cuañese'e ne tì'añe pa'iji, tayoÿe peoyerepa.

¹¹ Si'aye yure mai pa'i tëcahuë pa'iyere ñani cuasajë'ë, tsoe sëta maca'ë huëo caicohua'i. Yureta'a maire huasoye ai ja'yere pa'iji. Ja'në so'o macare paji'i, mai itire pa'ë cuasajë i coca asa maca.

¹² Tsoe jai ñamire pa'ë. Yure je'nërepa ñata tome huëoji. Jaje pa'ina, jéoñu'u, nea hue'ñana co'amaña yo'oye. Jeoni suñañu'u, mia ca'core pana, soldado huajo saquë suñañeje pa'ye.

¹³ Nuñe de'oÿe ñare pajë yo'oñu'u, mu'sere yo'oyeje pa'ye. Cu'ima'pë pañu'u, conore cueperojajë, jaiye ao aijë. Tsí'sini josa piskiye yo'ojë cayere yo'oma'pë pañu'u. Nuñerepa yo'oye pa'ina, coa co'aye si'sire yo'orojaima'pë pañu'u. Coa si'aye co'ayere ye'yesicohua'ipi pa'ima'pë pañu'u. Te'e cuasama'pë do'ire uihuayere pa'ima'pë pañu'u. Cui'ne yecohua'i payere ëa ñajë oima'pë pañu'u.

¹⁴ Coa ai jerepa mësaru cato suñañejë'ë, Ëjaërepa Jesucristona, ije pa'i pa'ijajë cajë. Jaje yo'oni çapë

co'aye yëyere ne huasocaiye paja'cohua'i.

14

Cajeire Cuasaye Cato

¹ Jaje pa'ina, Maija'quëre necaiquëre pare cuasayere joyo tutu carasiquë pa'ito, tsiojë'ë, ite, p'ai cuasase'ere ca huëoni sa'ñe uihuama'pé.

² Ñajë'ë, cui'ne iyere, yecohua'i cuasacohua'i pa'iyë. Si'aye aqñese'e de'oji cuasajëna, yecohua'ipi Maija'quëre necaiquëre pare cuasaye joyo tutu carajäicohua'ipi ja'o cui'ne aq, cui'ne cä aqñe de'oji cuasayë, hua'lí cato aima'cohua'ipi.

³ Jaje pa'ina, si'aye aiquëpi yequëre hua'lí aima'quëre co'aye cuasaquë ñama'ë pa'ijë'ë. Cui'ne iyepi de'oye a'ë caquë sahuaquë si'ayere aiquëjë cue'cuema'ë pa'ijë'ë. Si'aye aiquëre, cui'ne hua'lí aima'quëreje Maija'quëpi tsiosicohua'i a'ë.

⁴ Jaje pa'ina, ¿më'ë iquei'ni yequëre necaiquëni ñaquë tayo yo'oji caquë yo'o ja'ñe? I ëjaëpi ñañe pa'iji, de'oquë panita'a co'aquë pa'iyé. Jaje pa'iquëta'are de'oquërepa pa'ija'quë api, mai Ëjaë de'oye ne tutu paquëre me, me co'aquë'ni.

⁵ Yequejë quëaye payë: Pa'iyë, yecohua'i ai jerepa ëja mu'se pa'iji, cuasacohua'i. Cui'ne yecohua'ipi cuasacohua'i pa'iyë, si'a mu'seña cui'ne pa'yese'e pa'iji. Jaje pa'ina, p'ai ñape itire pa'lë cuasase'ere cuasajë pa'iyé pa'iji.

⁶ Iye mu'se ëja mu'sere pa'ë cuasaquë yo'oquë pani Maija'quëni de'oye yo'oji. Cui'ne si'aye aiquëjë mai Ëjaëni de'oye yo'oji, Maija'quëre de'oji caquë pëpa toquë aï do'ire. Cui'ne hua'lí

aima'quëjë Maija'quëre sei ai do'ire de'oye yo'oji,
mai Ëjaëni.

⁷ Jaje pa'ina, mai pa'ima'pë pa'iyë, maija'a co'ye pacacaijë. Cui'ne ju'inije ju'ima'pë pa'iyë, maija'a co'ye jucacaijë.

⁸ Jaje pa'ina, mai huajëcohua'i pa'ini pa'iyë, mai Ëjaëni pacacaijë. Cui'ne jüni huesënije mai Ëjaëna jucacaiyë. Jaje pa'iyé sëte ja pa'inije cui'ne jüni huesënije mai Ëjaë tsécohua'i pa'iyë.

⁹ Jaje pa'ina, huajëcohua'i cui'ne ju'isicohua'i Ëjaë pasi'i caquë Cristo jüni cui'naëpi huëjil'i.

¹⁰ Jaje pa'iquëta'are ¿më'ë me yo'oquë Maija'quë do'iquëre co'aye caquë'ni? ¿Panita'a me nesi'quë coequë ñaquë'ni? Mai yo'ose'e si'aohua'i Maija'quë ña hue'ñana iñaja'cohua'i a'ë, ipi paï ñape yo'ose'e ñaquë ca huesoja'quëre.

¹¹ Jaje pa'ina, toyase'e caji:
Care payë, caji, Ëjaë. Si'aohua'i yë'ë ña hue'ñana do're ja'ruga'cohua'i a'ë.
Cui'ne ja maca si'aohua'i de'oquëre pa'ni Maija'quë caja'cohua'i a'ë.

¹² Jaje pa'iyé sëte, paï ñape mai yo'ose'e iñaja'cohua'i a'ë, iti yo'ose'eje pa'ye, Maija'quëna.

Ne Taoñe Pajë'ë, Maija'quë Do'iquëre

¹³ Jaje pa'ina, yecohua'ire señajë cayere jeoni coa ai jerepa iohua'i asase'ere cuasajë de'oyere yo'ojë pa'ijë'ë, Maija'quë do'ijë ne taoja'core nema'pë cajë.

¹⁴ Yë'ë cato asayë, si'aye si'si peoyese'e pa'iyé Ëjaë Jesure sehuoquë sëte. Jaje pa'ire paji, cuasaquë asayë, iye. Jaje pa'iquëta'are paipi

iyé si'si a'ë cuasato jare si'si pa'iji, iti jaje cuasaquëse'ere.

¹⁵ Jaje pa'iquëta'are më'ë aiñepi sehuosiquë Maija'quë pa'ire paji cuasayere nejoñe pa'ito më'ëpi ite oiyé paquë yo'oyë. Jaje pa'ina, Cristo jucacaisiquëre më'ë aiñepi nejoñë paquë caquë pa'ijë'ë.

¹⁶ Jaje pa'ina, sa'ro nëocaima'pë pa'ijë'ë, yecohua'ipi co'aye mësaru de'oye yo'oje pa'iyere cama'cohua'ini.

¹⁷ Jaje pa'ina, Maija'quë cuañe te'te cato pa'ima'ë pa'iji, coa aqo aiñepi cui'ne ucuyepi. Coa itirepa cato nuñerepa pa'iyé a'ë, de'oye jo'cua pa'iyé a'ë, cui'ne sihuaye a'ë, Maija'quë joyo pa'i do'ire.

¹⁸ Jaje Cristore de'oye necaiquë pa'ito ja necaiyepi Maija'quë sihuayere neñe pa'iji. Cui'ne jaje pa'ini paíje de'o paí api cajë ñañe pa'iji.

¹⁹ Jaje pa'iyé sëte co'ejë pañu'u, de'oye jo'cua pa'iyena sayere. Cui'ne ai tutupi yo'oje co'eñu'u, mai ai de'oyena sa ja'ñere, si'aohua'i ai de'ojajë cajë.

²⁰ Jaje pa'ito ai do'ipi Maija'quë nese'ere nejoma'ë pa'ijë'ë. Si'aye aiñe cato si'si ti peoye a'ë. Jaje pa'iquëta'are, mai ai do'ipi yecohua'ire ne taoñe cato ai co'are paji.

²¹ Ja do'ire Maija'quë do'iquëre hua'i aiñepi, cono ucuyepi, coa si'aye yo'oyepi ne taoñe pa'ito nuñë yo'oye peoji.

²² Maija'quë ña hue'ñana si'aye aiñe pa'iji cuasaquë pani jare paire carojaíma'ë coa më'ëse'e paye pa'iji. Sihuaquërepa pasipi, tayo yo'osiquëje pa'ire nëima'ëna, pa'iquë cato.

²³ Jaje pa'iquëta'are i cuasayepi aiñe cui'ne pañe cuasaye pa'ina, iti coa asaquë aiquë pani jai do'i ani huesëye pa'iji, i cuasaye quëayere yo'oma' do'ire. Jaje pa'ina, si'aye mai sehuosicohua'i cuasayepi quëayere neñe pa'iji. Paquë pani co'aye neñe a'ë.

15

Paini De'oye Yo'ojë'ë, Më'ëja'a Co'ye Oima'ë

¹ Maipi tutu quë'iohua'ipi Maija'quère necaiquëre pare cuasacohua'ita'a jopo carasicohua'ipi de'oye yo'oma'cohua'ire quëcojë cocaiye pa'iji, tutu peocohua'ire. Maise'e de'oye pa'iyere cuasaye pañu'u, Jaje pa'ina, maipi cocaiye pa'iji, jaohua'ire.

² Jaje pa'ina, pai ñape mai cajeohua'ire de'oye yo'oye pa'iji, i de'oye pa'i ja'ñere cajë. Cui'ne i Maija'quère ai seña maca jaiye cuasaguë mëi ja'ñere cocaiye pa'iji.

³ Ñajë'lë, Cristo i de'oye pa'iyere cuasama'ë pajil'i. Coa ai jerepa toyase'e cayere yo'o tji'api, ñeje cayere: "Më'ëre pëicohua'i pëiñe yë'ëna tomeipi."

⁴ Si'aye iye ja'në tsoe toyajë pa'ise'e toyase'e a'ë, mai ye'ye ja'ñere cuasajë. Itina ñajë ai yo'oye pa'itoje quëcojajë cui'ne huaso cuañoñe uteye pajajë cajë toyase'e a'ë.

⁵ Jaje pa'ina, Maija'quëpi yo'o juja ma'ñe cui'ne yëhuo huasoye isiquëpi, cocaijaquë mësarute yecohua'i ja're coni de'oye yo'ojë pa'i ja'ñe Cristo Jesús pa'ise'eje pa'ija'cohua'ire.

6 Jaje pa'ijë si'aohua'i te'e Maija'quë Diusure de'oquëre pa'ni cajë sihuaja'cohua'ire, mai Ëjaë Jesucristo pëca ja'quëre.

Judío Peocohua'ire Quëaye

7 Jaje pa'ije sëte pai ñape yecohua'ire de'oye tsiojë'ë, Cristo mësarute de'oye tsiose'eje pa'ye, si'aohua'i Maija'quëre de'oquëre pa'ni cajajë caquë.

8 Jaje pa'ina, cayë. Cristo cato judío paire necasi'i caquë daji'i, mai aiohua'ire ca nëoquë pa'ise'ere yo'o tí'asi'i caquë. Jaje yo'oquë Maija'quë i ca nëose'ere nuñerepa yo'o tí'aquë pa'iyere ínosi'i caquë.

9 Daji'i, cui'ne judío pai peocohua'ireje, Maija'quëre de'oquëre pa'ni cajë sihuajajë caquë, teaye ñani oni yejesi do'ire. Toyase'e cayeje:

Jaje pa'ina, mël'ëre de'oquëre pa'ni casi'i si'a yeja pai pa'i hue'ñana.

Cui'ne më'ë mamire sihuaquë jëjësi'i.

10 Cui'ne yequë hue'ñna toyase'epi caji:

Sihuajë'ë, pai daripëa, Maija'quë tsecuhua'i ja're coni.

11 Cui'ne yequë hue'ñna toyase'epi caji:

De'oquëre pa'ni sihuajë cajë'ë, Ëjaëre.

Pai yejaña cui'ne si'a pai daripëa maña, judío pai peocohua'ipi.

12 Cui'ne Isaíasje toyapi:

Isái tsëcapë aquëpi Ëjaë pa'ija'quë api.

Pa'i jaëpi si'aohua'i judío pai peocohua'ire cuañeja'quë api.

Cuañequëna, jaëpi necaija'quë api cajë uteja'cohua'i a'ë.

13 Maija'quëre señë, mai utejë pa'iye isiquëre, sihuaye cui'ne ti se co'a ju'iñe peoyerepa pa'iye isija'quë caquë, mësarute jite necaiquëre pare cuasacohua'ire. Jare isiquëna, pa'ijë Maija'quë joyo tutu quë'iohua'ipi Maija'quë ca nëose'ere de'oyerepa utejë pa'ija'cohua'ire caquë secacaiyë.

14 Maija'quë do'ijë, yë'lë tsoe asayë, mësarute de'oye yecohua'ire cuasayena timësicohua'ipi pa'iye, cui'ne si'aye ta'ñë asacohua'ipi pa'iye, cui'ne de'oye cuasajë yecohua'ire yëhuocohua'ipi pa'iye.

15-16 Jaje pa'iquëta'are ca'rama'quëpi nuñerepa quëasi'i caquë iyere toya saoyë, mësarute tsoe asa maña coni, mësarupi huñeyema'pë pa'ijajë caquë. Yë'lë cato judío peocohua'ire caquë Jesucristore necaiquëpi yo'oyë, Maija'quë oi do'ipi yë'ère cuañese'eje pa'ye. Jaje pa'i do'ire iyere caquë toyayë, mësarute. Yë'lë Maija'quëre necai yo'oye cato iye a'ë. Judío pai peocohua'ire huaso cocare quëaye a'ë. Jaje yo'oyë, jahua'i Maija'quë joyo yo'o do'ire Maija'quë tsécohua'i pa'ijajë caquë. Jaje pa'ina, jahua'i de'ocohua'ire pani ina isisi'i, Maija'quë tsécohua'i pa'ijajë cajë, cui'ne Maija'quë sihuaja'quë cajë.

17 Maija'quë co'amaña necai yo'osi do'ire de'oyerepa yo'ohuë caye pa'iji, yë'ëpi, Jesucristore sehuosiquë sète.

18 Jaje pa'ita'are coa yequere caye coeyë. Coa Cristopi yë'lë ja're tsioni nese'ere caye yëyë, judío pai peocohua'ipi Maija'quëre asani de'oye sehuocaise'ere. Iye cato yo'ohuë, coa quëayepi cui'ne ne iñóñepi coni.

19 Pai yo'oma'a tutupi yo'o iñequë cui'ne Maija'quë joyo tutupi yo'oquë iñequë quëahuë. Jaje yo'oquë huaso coca quëacaiye de'oye quëa ti'ahuë, Jerusalén huëosiquëpi cui'ne si'a hue'ña Ilirico yeja quë'rore paja'ana.

20 Jaje yo'oquë quëahuë, huaso coca Cristo mami ti asama'cohua'i quë'rона, yecohua'i tsoe quëasicohua'ini cui'na emeje'ena meñe quëa coñere coequë.

21 Coa ai jerepa de'oye yo'ohuë, toyase'e cayeje pa'yé:

Ñaja'cohua'i a'ë, i pa'iye aye ti asama'pë pa'isicohua'ipi.

Cui'ne asa ti'aja'cohua'i a'ë, i caye ti asama'pë pa'isicohua'ipi.

Pablopí Roma Quë'rона Saiyere Cuasapi

22 Jaje iyere yo'oquë pa'i do'ire jaro do'i sani ñama'ë paë'ë, si'anë sani ñañe yëquëta'a.

23 Yure yë'ë iñyo'oquë ne saosiquë sëte, yë'ë Españaña sai maca de'hue mësarute do'i ñasi'lí, ai tsoe mësarute ña ëa ju'isiquëpi.

24 Mësarute ña huajësi jeteyo'je mësarupi yë'ëreje jëjo saocaiye pa'iji, Españaña quë'rона.

25 Jaje pa'iquëta'are yure cato Jerusalénna saiyyë, sehuosicohua'i jaro pa'icohua'ire cocai ja'ñere saquë.

26 Jerusalén sehuosicohua'i curiquë peocohua'ire isi ja'ñere, Macedonia cui'ne Acaya pa'icohua'ipi ñohua'i cuasayepi curiquë tsi'soñu'u cuasahuë, jëjo sao ja'ñere.

27 Ñohua'ipi sihuajë curi tsi'soni jëjo saohuë, Jerusalénna, judío pai sehuosicohua'ire, judío

paipi Maija'quë coca quëa do'ire judío peoco-hua'ipi Maija'quë joyo pa'iyere t̄j'ahuë, huaso cocare. T̄j'asicohua'ipi iye yeja ayere curiquépi judío pai sehuosicohua'ire cocaiye pa'iji. ¿Me pañe'ni?

²⁸ Jaje pa'ina, si'aye iye yo'o t̄ejini cui'ne curiquë sehuosicohua'i tsil'sose'e Jerusalén p̄aina isisi maca sai huéoja'quë a'ë, Espana. Jarona sai mësarute do'i ñaquë sasi'i.

²⁹ Iyere cuasayë. Yë'ë mësaru quë'ro saisi maca t̄j'aja'quë a'ë, Cristo coca quëaye t̄jimësiquépi mësarute quëa huaso ja'ñere saqué.

³⁰ Maija'quë do'ijë, mai Ëjaë Jesucristo do'ipi cui'ne Maija'quë de'o joyo mësarute oi do'ipi mësarute señë, yë'ëre cocaijë'ë, mësaru Maija'quëre secacaiyepi.

³¹ Maija'quëre secacaijë'ë, Judea pa'icohua'i sehuoma'cohua'ipi yë'ëre co'aye yo'oye p̄aja'cohua'ire cui'ne yë'ë sacaise'e de'oye sihua j̄ise'e pa'ija'core Jerusalén sehuosicohua'i pa'icohua'ipi.

³² Jaje secacaijëna, Maija'quëpi yëna, mësaru quë'rona sihuaquë saijsa'quë a'ë, mësaru ja're coni pëa huajësi'quë pa'ija'quë caqué.

³³ Maija'quë de'oye pa'iyé isiquépi si'aohua'ire mësarure pa'ijaquë. Jaje pa'ijaquë.

16

Pai Ñapere Pëpaye

¹ Cencrea sehuosicohua'i pa'icohua'ire cocaio pa'icons Maija'quë do'ico, de'ocore pao, Febeni caqué quëayë, mësarute.

² Jaore de'oye mai Ëjaë mamipi cuasajë yo'ocaijë'ë, sehuosicohua'ire te'e cuasacohua'ire yo'oyere papi yo'ojë. Jaje yo'ojë cui'ne si'aye jote jopo co'amaña caraye pa'ito cocaíjë'ë. Jao cato jai paire cocaísicoa, cui'ne yë'ëreje cocaísicoa.

³ Pëpacajë'ë, Priscilare cui'ne Aquilare, yë'ë ja're coni Cristo Jesús co'amaña cocaísicohua'ire.

⁴ Jaohua'i cato yë'ë pa'iyere huasoñu'u cajë johua'i pa'iyere ti nejo cuañoñe ja'i maca huajëya'yerepa yo'osicohua'ire. Jaje pa'ina, yë'ëse'e de'oji, johua'i yo'ose'e caye pañë. Cui'ne de'oji, cayë, jaohua'i yo'ose'e Maija'quë do'ijë judío pai peocohua'ije.

⁵ Pëpacajë'ë, Priscila cui'ne Aquila huë'ena Maija'quë do'ijë tsisicohua'ire. Pëpacajë'ë, Epenetore, yë'ë oiquëre, Asia yeja aquëpi du'ru macarepa Cristo coca asani sehuoquë pa'isiquëre.

⁶ Pëpacajë'ë, Maríareje mësarute cuasaco jaiye necaio pa'isicore.

⁷ Pëpacajë'ë, yë'ë cajeohua'ire Andrónicore cui'ne Juniasre yë'ë ja're coni co cuño sito te'e pa'isicohua'ire. Jao hu cato Jesús jëjo saocohua'ipi ai de'ocohua'i a'ë, cayë. Cui'ne jaohua'ipi du'ru sehuosicohua'i paë'ë, yë'ë ja yë'ta'a sehuoma'në.

⁸ Pëpacajë'ë, Ampliatore yë'ë oiquëre mai Ëjaë do'ipi.

⁹ Pëpacajë'ë, Urbanore mai ja're coni mai Ëjaë co'amaña yo'oquëre, cui'ne yë'ë oiquë Estaquisre pëpacajë'ë.

¹⁰ Pëpacajë'ë, Apelesre, Cristore coa necaiquëre pare asaquëpi jaiye neñañe pa'itoje quëcosiquëre.

Cui'ne pëpacaijë'ë, Aristóbulo tsëcapëre í huë'e pa'icohua'ire.

11 Pëpacaijë'ë, yë'ë cajeire Herodiónre, cui'ne Narciso tsëcapëre, mai Ëjaëre sehuocohua'ire.

12 Pëpacaijë'ë, Trifенare cui'ne Trifosare, mai Ëjaë co'amaña necaicohua'ire. Cui'ne mai oicorepa Percidare mai Ëjaë co'amañare ai cuasaco necaio pa'icore pëpacaijë'ë.

13 Pëpacaijë'ë, Rufore, mai Ëjaëre sehuoni pa'iquëre pare. Cui'ne í pëca ja'core yë'ë ja'coje pa'iore pëpacaijë'ë.

14 Pëpacaijë'ë, Acincritore, Flegortere, Hermas, Patrobas, Hermes cui'ne johua'i ja're coni pa'icohua'ire. Si'aohua'ire pëpacaijë'ë, Maija'quë do'ijëre.

15 Pëpacaijë'ë, cui'ne Filoyo cui'ne Juliare, Nereore, cui'ne io yo'jeore, Olimpasre, cui'ne si'aohua' i johua'i ja're coni Maija'quë do'ijë pa'icohua'ire.

16 De'oyerepa sä'ñe sihuajë pëpajë'ë. Si'aohua'i Cristore asacohua'ipi mësarute pëpa saoyë, jaro pa'icohua'ire.

17 Maija'quë do'ijë señë, mësarute. De'hua ñajë pa'ijë'ë, yequë tsëcapë a'ë cajë yo'oye, cui'ne ne tãoñe necohua'ire. Jaje yo'oye cato mësaru case'ere säñope yo'oye a'ë. Jaohua'ire tsioma'pë pa'ijë'ë.

18 Jaje cacohua'i cato mai Ëjaë Jesucristore necaima'pë pa'iyë, coa ai jerepa johua'i de'oye pa'iyere cuasajë yo'oyë. Jaje yo'ojë esa sehuo-caicohua'ini coa cosoyë, johua'i q'ji maña de'o yë'o cayepi.

19 Si'aohua'i asayë, mësaru de'oye sehuocaise'e. Jaje pa'ina, yë'ëje sihuayë. Ja yë'ta'a mësaru t̄a'ñe cuasacohua'i pa'ijá'cohua'ire caquë secacaiyë, mësaru de'hue de'oyere yo'ojajë caquë, cui'ne co'ayere ti yo'oma'pë caquë.

20 Jaje pa'ijëna, Maija'quë de'oye jo'cua ai cuasama'pë pa'iyé isiquëpi Satanás huati ñajaëre mësaru quëo huë'ehuëna esa jëjo oaja'quë api. Mai ñajaë Jesucristopi de'oye ñacaina, de'oye pa'ijë'ë.

21 Mësarute pëpa saoji, Timoteo yë'ë ja're coni co'amaña nequë pa'iquëpi. Cui'ne Lucio cui'ne Jasón, cui'ne Sosípater yë'ë cajeohua'ipi mësarute pëpa saoyë, jaro.

22 Cui'ne yë'ë Terciojë iye toya ja'hua toyacaiquëje jaro mësarute pëpa saoyë, mai ñajaërepa do'ipi.

23 Mësarute pëpa saoji, Gayojë. I huë'ere pa'iyë, yë'ë, cui'ne i huë'ena si'aohua'i sehuosicohua'i tsisijë pa'iyë. Cui'ne pëpa saoji, Erastojë, pa'i pa'i daripë curiquë de'huacai pa'iquëpi. Cui'ne Maija'quë do'iquë Cuartojë pëpa saoji, jaro.

24 Mai ñajaë Jesucristo coa isiyepi mësaru ja're pa'ijäquë. Jaje pa'ijäquë.

Pëpa Tëjiye

25 Tsoe mësarute quëahuë, huaso cocare. Ja cocaja'a asayë, mai. Maija'quë mësarute quëcojë nëñerepa pa'icohua'ire necai tuture payë. Ja do'ire mësaru i tsecuhua'ipi pa'iyë. Iye yo'oyere cato iye yeja de'huama'në Maija'quë nesi'i cuasase'e a'ë. Jare tsoe yahuese'e pajil'i.

26 Jaje pa'iquëta'are yureta'a Maija'quë ti pani huesëquëpi cuañequëna, Maija'quëre

quëacaicohua'i toyase'eja'a yure cato maire iñopi. Cui'ne Maija'quë nesi'i cuasa nëose'e yahue pase'ere si'a yejaña pa'icohua'ire iñopi, jaohua'ipi itire pa'ë cuasajë de'oye i cuañeñe sehuocaijajë caquë.

27 Maija'quë te'i si'aye asaquë ta'ñe pa'ire pani si'anëpi Jesucristo do'ija'a de'oquëre pa'ni cajë si-huajë pañu'u. Jaje pa'ijaquë.

Maija'quë Huajë Ca Nëose'e New Testament in Secoya (EC:sey:Secoya)

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Secoya

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

995e68c5-fe57-54e6-bf8e-0637526d3f7d